

大

司

澤

澤

蕭

悅

署

蕭

黃	秀	外	壘
綃	婦	孫	曰

序

吳江陳巢南輯其邑中自宋至清之詞凡二百餘家題曰笠澤詞徵刊於歇浦友人安吳胡韞玉紱之曰慨自輓近士子好箸書不好刊書日買廢銅以事鼓鑄短簡小冊充塞書肆閱之令人憎惡而古人瀏亮精妙之文反致湮沒不顯文字之厄未有甚於今時也陳子文詞爾雅卓乎可傳顧不自刊集獨搜羅故老遺賢之詞爲之輯而傳之陳子迥異乎人哉陳子謂余是編之成凡十有四載中嘗東浮滄海南走閩粵西涉湖湘北踰幽燕放棹西子之湖驅車山陰之進未能一日安居也獨于詞徵之輯未嘗稍輟然則嶺海渺茫朔風凜冽吾知陳子必展玩是篇慷慨悲歌泣數行下者若夫山水清奇雲烟澄澹清氣沁人空翠欲滴曼聲長歌張志和斜風細雨之句當又必然心曠而神怡也陳子之於詞徵固悲樂與共者乎又謂

嘗於役新安過安吳泛舟桃花潭時值隆冬雪大如掌山寂無聲人  
清欲絕乃獨挾詞藁高歌下酒酒酣耳熱推篷一望玉嶂在前水澈  
見底以爲宛陵山水之奇不數剡溪訪戴意必有詞人畸士生於其  
間若梅聖俞施愚山之文采風流尙能徵乎余聞之赧無以應顧益  
以知陳子之輯詞徵其用心爲高人一等也嗟夫古之文人寄迹草  
野吟詠自娛每當一韻之奇一字之巧不知幾費心血以祈必傳乃  
時移世異書卷飄零而後起之英又好自騁才率爾著作錢梨壽棗  
以求名高古人文字漠不加意若余者乃亦不能輯鄉賢之遺文傳  
之而陳子能之此其用力謂非獨勤也歟社盟弟安吳胡韞玉謹叙

序

昔黃山孫默無言居揚州嘗歲暮渡江欲徵鄒程邛彭羨門王阮亭三家所箸麗農延露衍波詞合刊之陽羨陳迦陵贈以詩曰秦七黃九自佳耳此事何預卿飢寒蓋竊笑其好事也吾師巢南子當珠申末造揭黎民族倡導國人爲文章踔厲奮發盪人心魂節概昭著一時天下謀光復者固罔不知有巢南其人矣顧獨不屑取功名殷殷然以倚聲自娛所撰病倩詞步武姜張肩隨辛柳洵能合空靈雄健爲一壚者然又自閤恐惟人知而時喜求他人之詞刊之戊申歲暮曾爲余刻懺慧詞明年冬又爲其鄉袁節婦刻寄塵詞頃歲又暮矣吾師方從塞外歸迺甫卸裝即盡刊其所纂笠澤詞徵若干卷噫何其孜孜弗勸而甚於無言之好事也然余觀是編始宋迄今代有探討舉凡達官名彥寓賢閨閣弘章鉅製斷簡殘篇罔不兼綜博采次

第分明煌煌虔誠一邑之巨觀而千秋之盛業也詩有之曰維桑與梓必恭敬止詞雖小道而屬之掌故則關繫至鉅夫亦何遽可以好事目之耶刊且竣來督爲叙自慙舛陋于清空騷雅之旨茫無所會惟當師編纂時華固嘗執筆其後爲之攷訂而鞞寫者亦六閱寒暑矣感歲月之不居喜陳編之有獲因爲叙之如此亦使讀其書者知方今之世菰蘆人物尙有忍飢寒而爲無言之所爲者其襟抱又豈尋常所可測哉民國二年歲暮禦兒徐自華謹敘

序

吾友陳子佩忍既刊行松陵文集之二年又次第刊行其所輯笠澤詞徵遠道貽書郵本見示祖澤受而讀之見其始宋迄清甄錄者逾二百家揚挖風雅闡彰舊聞博精壹意網羅無遺可謂盛矣吾邑自中唐以來聲韻之學導源皮陸方軌齊軫代有作者而長短句實爲詩餘之祖北宋而後才雋輩出凡上公騷客碩彥名媛跡其遙情勝概殊呻豪吟抗手蘇辛肩隨秦柳曾何多讓然七百年來勒山先輩始有輯錄流傳未廣孤本難求篇第概略末由窺涖嗣是厥後音塵闕如陳子以後起孤根振斯墜緒覷幽索隱遠紹旁搜舉凡冷攤僻肆官書私譔恣其心目之營謀偶有所得恆於客邸旅廨雪鈔露纂首尾十年一一整理出之塵翳而悠然遐寄芬芳悱惻之懷尤在趙朱末禩篩士遺黎之作零篇墜簡或遇之非望互慰大歡如獲瓊寶

自古在昔先民有作張皇耳目發摛韶護非君莫任風雨如晦雞鳴  
不已後之視今亦猶今之視昔立黃反復道喪斯文繫我陳子靈想  
在襟含宮嚮徵耽研一室篋有成書斯亦天心來復之見端而詞苑  
沈沈中空谷足音也一別十年鬢毛各蒼回憶退思堂前君在里中  
設帳處  
文酒高譚顯如昨夢荏苒分飛愉悵異境卷施之草拔心不死傷懷  
家國祝宗是祈又何暇措心文字聖室荒江湖風如吼讀君是編感  
日月之不淹景前修而仰止吾知垂虹釣雪之鄉必有姚冶驚才狎  
主齊盟繼靈芬洮瓊而起以慰君守先待後之盛心者遐想所在或  
成事實願君崇令德皓首以爲期此則下走綴辭簡末之微意也民  
國二年陽月金祖澤謹序



序

吾邑川原清麗地氣疏明人毓具區之靈家挹楓江之秀漢晉而下  
代有聞人梁苑蜚聲巖夫子之文采吳江歸思張曹掾之風流玉篇  
擷蒼雅之精斯文宛在漁具擅東南之美倡和偏工夫固正正儲儲  
登諸藝苑鱗鱗炳炳蔚爲文宗矣迺樂府翻新茲事亦盛玄真開山  
流風用鬯嗣音不虛作者代起此求彼應前喁後于白石宗風玉田  
雅趣一鄉之善蒼而萃焉夫題襟捉席嗟已事之成塵聞樂拊心應  
求聲于既往惟是年代牢落聞睹差池冥剔乾螢讀殘絳蠟柳耆卿  
曉風殘月蘇學士玉宇瓊樓鱗爪一現顯晦輒殊起九京之賢而會  
於一室數百家之珍以蔚爲巨觀不憂乎其難哉陳子巢南乃有笠  
澤詞徵之輯上自唐宋下迄今茲計二百餘家都二十六卷莫不奮  
藻含章揚華振采具馨逸之致窮幼眇之音各自名家徽徽稱盛蓋

亦足追漚尹湖州之輯凌香東粵西之徵矣夫靈響遙集詎僅徵文  
獻于陬隅而雅聲遠姚抑以覘升沈之世運乃者關山瀕洞宇宙蝸  
蟾素琴已焚黃鐘並棄斯文之墜不絕如縷先哲云亡來日大難陳  
子獨咀含鄉味模範前型選材於辛柳之林瓣香於歐黃之室荒江  
子影猶見大雅之遺滄海橫流未忘正樂之志則是編之輯豈惟古  
瑟獨彈寒竽失響其所以存劫餘之先矧爲來哲之引嚶者厥功爲  
匪尠也若謂身拘魁父之邱日窘涔蹄之水在鄉言鄉得寸則寸是  
殆未知陳子出處大概而豈足以語有心人之樂操土風數典述祖  
也耶是爲叙同盟弟蔡寅謹叙

序

陳子巢南以所撰笠澤詞徵劄將半屬余一辭巢南博聞強識鄉邦文獻若數家珍居恒咤歎潘氏文集朱氏文徵顧氏文起周氏文粹之淪胥俱盡凌氏文錄之拘拘輓近遺漏弘多時引爲病至若周氏詞選之弗彰二百年來尤廣陵絕響雖好事如郭靈芬不聞有所采掇坐令宋明以來名卿長德騷人逸士閨秀寓賢之清詞綺語漂搖放失胥在若明若昧問不獲有所附麗以永其傳寧非粉榆之不幸而詞苑之大哀乎用是發奮思補纂文集以追力田之舊別撰詞徵竟勒山未竟之業晦明風雨十載於茲文集卷帙繁重先刊初編以質當世而詞徵二十六卷迺次第殺青焉其用力可謂勤矣棄疾不敏疎於倚聲總律之學少有所作託體蘇辛弗諧時尚復慮循規越矩重爲當世詬病君苗焚硯班掾投筆遑敢妄有論列以辱先民

唯是詞徵之輯造端經始實廁前馬鈔肯羣籍撫拾遺聞亦微有一日之勞故于其成不能不手爲加額慶舊物之重光也中華民國二年十二月邑子柳棄疾謹叙

序

慨自風雅道喪詩餘迺興含情繇貌體物瀏亮襲騷選之餘音以比

興爲職志美人香草闡厥風情秋月春花供其陶寫登山臨水隔千

里兮懷人弔古傷今望星河而飲涕凡茲賦咏悉本靈襟以言音聲

奚殊正始是以文史從容之彥江湖嘯傲之身關山之所跋涉戎馬

之所奔馳與夫思婦羈人孤臣戍卒際風塵之瀕洞值雨雪之紛綸

莫不哀嘯孤呻馳魂盪魄托微言于短律發清響於寥穹也寧云玩

物喪志儒者所鄙雕蟲小技壯夫不爲哉吾邑松陵古號笠澤具區

萬頃洞庭雙峙雲樹翳其微茫風濤震而相盪晴波漱灑有白鷗沙

鳥之翔繡壤交加足秔稻魚蝦之利所謂地擅茲勝天竺厥生非無

故也故夫畸人碩士彬彬蔚起文章經濟倬倬其倫試披潘氏獻集

之所頌歎

松陵獻集明節士  
潘樾章田力著

固知文學淵藪具在於是而區區倚聲

亦遂奄有羣妙獨擅當時焉何言之蓋趙宋南渡填詞始盛衣冠之  
儔都諳音律風聲所樹朝野翕然而吳江一縣爲王畿所屬且當南  
北衝涂舟車輻輳垂虹明月釣雪晴沙斜日鱸鄉半篙淞水固才人  
之所凝想而舉世以爲風流者也水調歌成驚潛龍之出聽梅花曲  
譜載紅袖兮歸來韻事流傳作者紛起壺天詞旨承玉田張氏之傳  
陸行直字輔之伯時指迷剛夢窗覺翁之奧沈義父字伯時別號時  
著詞旨二卷海棠月滿度徹瓊簫行直有致仕還分湖問訊海棠  
詩又題其所居曰舊時月色秋草墳荒憐伊  
鬼唱行直姬人卿卿  
墓在北邙雖舉目有河山之異而遺民無被祗之差故胡  
元入主騷壇遽絕嗣響至朱明踐祚墜緒乃獲重尋然而一線中微  
仔肩匪細設當斯文絕續之交不有博雅弘通之彥爲之提倡風騷  
別裁僞體則後之學者從事其間將何所稟承而明厥趨嚮是斯道  
不幾淪墜而迷謬日以繁滋哉迺詞隱先生出吹律定聲訂正宮譜

而承學之士遂得門徑天寥道人繼之伉儷以外競尙新聲帷房之

內爭傳樂府庸是沈氏一門人人有集汾湖諸葉葉交光天台無葉泐師

叙反生香誦吳門懷古諸篇擊唾壺而欲缺長興伯吳易著北征小

諷胥江競渡之闋欵流水兮無情沈自炳女蘭支有水龍吟一闋以

耳詩曰人之云亡邦國殄瘁語云不有佳作其何以興則當此之時

安得不廢書而歎掩卷欲泣耶或者顧謂茲事猥瑣無與家國向阿

堵傳神非大處落墨豈通論哉是故讀滿江紅調悲鵬舉之栖遲唱

大江東去慨坡翁之鬱勃而循是以求吾詰蓋非長興吳公中書沈

公殆莫屬焉秋笳虹亭曾何足比而事愈可傷已自是厥後已哇玉

樵繼踵增武學山元禮更倡迭和香嚴瘦山並箸飛鴻海紅之篇辛

甫壬甫且有潛吉宜雅之集而浮眉樓主崛起孤根之中湘涓袁氏

承襲爾雅之後尤能發揮指趣推闡幽微澹花間草堂之長意黃絹

幼婦之譽遂乃執持牛耳雄長騷壇無尹邢避面之嫌有瑜亮一時  
之日而靈芬洮瓊竟爲詞學宗焉豈不盛哉嗟嗟江湖日下悲韶護  
兮難求邏渺紛陳聽箏琶之迭奏過鬢宮而訂樂彈徹胡琴采孺子  
之新歌不成楚調陽春白雪傾耳誰聞下里巴音逢場輒遇詩有之  
曰如蜩如蟬如沸如羹此之謂也禮不云乎昔吾有先正其言明且  
清何可得哉僕用奮慨以爲和聲鳴盛縱絕元音而抱缺守殘願爲  
己任際荒江之垂翅聊竹素兮游心別明焰於將微撥餘灰而使爇  
竊不自揆就所攜撫輯北宋謝絳以下迄於近代凡若而人詞若干  
首爲書二十卷別撰閨秀寓賢諸作各得三卷附之都成集二十六  
卷名曰笠澤詞徵用副所纂松陵文集行焉嗚呼我邦人諸友大夫  
君子誠欲攷往哲之遺風續紛楡之盛業其詳覽之庶無膏已已酉  
仲秋下浣五日陳去病敘於古金昌亭下吳趨里



凡例

吾鄉爲文學淵藪人材輩出詩文詞曲彬彬稱盛故余旣編松陵文集貽後來者之模楷復於其暇纂述斯帙用存一方之雅音始宋迄今凡七百四十餘年得人二百數十爲卷二十有六創稿於清季庚子春仲告成於民國二年之冬計十有四載而予無聞之歲亦忽焉至矣感流光之易邁喜梨棗之能新爰記好懷聊以自慶云爾

承平之際儒生好古往往輯存前賢遺箸以免放失故邑中詩文輯本向亦不少獨倚聲自勒山周先生曾事纂集外竟無所聞且已亡佚不傳良堪惋念相傳先生嘗游日本登秦岱予亦曾經滄海俯覽亭云本編之作即謂高賢是比要何敢讓

詞肇於唐盛于宋中衰於元明而復盛乎清吾邑建自五季時方俶擾騷雅弗聞至宋謝氏自富春來遷父子兄弟咸以文學仕宦有聲

於時絲是詞采翩翩耀江澨矣故茲集即以弁首而立真子綠篔簹青  
笠一調又爲騷壇絕唱徒以其非土著因列之寓賢俾領袖羣彥

有宋遺民沈義甫夙與夢牕吳文英游頗喜填詞箸樂府指迷爲倚  
聲家主臬獨其詞未見陸輔之行直從樂笑翁游撰詞旨數十百則  
極號精博顧詞亦殊妙至明詞隱先生沈璟箸述尤富而詞竟不傳  
撫書凝想知古今雅樂之淪墜于水火兵燹者蓋極夥矣

輯書有三難搜羅斟酌與選別是也而選別爲尤難余爲是編自愧  
學識謏陋未能窺見詞家三昧故於前人名作微特不敢輕事去取  
即搜求攷較亦恆虞弗逮幸賴四方名彥與粉榆故舊爭相贊助俾  
成完箸義心清尙俱堪矜式甯第攻錯之功而已哉

中華民國二年癸丑冬暮巢南陳去病重識於海上之百尺樓

笠澤詞徵目次

卷一

謝絳

李山民

范成大

卷二

趙礪老

陸行直

陸祖允

卷三

沈韶

徐有貞

史鑑

吳洪

卷四

趙寬

周用

吳山

吳邦楨

沈一泉

袁黃

沈自徵

周永年

卷五

葉紹袁

吳易

沈自炳

卷六

毛瑩

俞南史

顧樵

湯豹處

鄒樞

吳鏘

沈永啓

沈永禋

沈世潢

卷七

沈永令

董衡

吳兆騫

葉燮

葉舒胤

葉舒崇

俞場

邱乘

卷八

鈕琇

沈雄

周銘

吳權

沈丹楸

卷九

徐鉞

沈時棟

徐湄

吳景果

葉舒璐

唐維申

周廷諤

沈栩

卷十

沈日霖

張棟

曹吳霞

袁棟

楊復吉

吳中奇

汪鳴珂

朱剡光

史善長

金芝原

顧我樂

項萼

周本

徐達源

周霽

周鶴立

屠拱垣

卷十一

袁棠

任兆麟

朱春生

程邦憲

邱岡

趙筠

朱世傳

袁宸

袁宸

卷十二

郭馨

卷十三

趙函

馮珍

陳燮

陳子諒

陳佐猷

陳對

陳三陞

陳蕊元

陳山壽

陳山甫

陳益壽

倪簡在

吳承錫

卷十四

鄭璜

葉鑽

沈煥

翁維

袁廷珍

袁廷瑞

陳來泰

朱瑞增

丁兆寬

王觀潮

金作霖

韓森寶

王錫璵

陸日勳

邱曾詒

徐錫第

郭栴

王與沂

卷十五

楊秉桂

周夢台

陳希恕

史致充

金鍾秀

張沅

張澹

孫靈琳

卷十六

唐壽萼

張寶鎔

張寶鍾

楊廷棟

施仁政

卷十七

仲湘 沈日壽 沈日富 沈日康 柳清源

殷壽彭 黃增祿 仲孫樊 計光炳 宋恭敬

卷十八

陳壽熊 董兆熊 金春渠 金文淵 袁廷琥

袁汝英 金華 葉乃漆 周乾元 吳文通

吳樟 吳霞佐 吳雲紀 黃楚湘 王禮

任釐瓚 黃寶書 陸焜

卷十九

柳兆薰 陶然 沈景修 莊人寶 凌泗

柳以蕃 凌其楨 楊壽煜

卷二十

袁汝龍 袁汝夔 任艾生 李我泉 施紹書

范鍾傑

凌寶樞

丁桂琪

沈成章

俞煥章

釋達塵

卷二十一 閩媛

胡與可

沈宜修

沈靜專

張倩倩

李玉照

周蘭秀

周慧貞

顧蘭佩

顧道喜

董如蘭

卷二十二

葉紈紈

葉小紈

葉小鸞

顏繡琴

沈憲英

吳芳

龐蕙纓

柳是

周瓊

葉文

沈靜筠

卷二十三

吳貞閨

吳靜閨

顧氏

沈少君

吳文柔

沈樹榮

沈菡紉

喻撚

吳森札

沈關關



沈友琴 沈御月 唐榛 吳瓊仙 汪玉軫

范玉 陸惠 姚汭 丁湘 王淑

許珠 袁希謝 于曉霞 華婉若 錢靜娟

卷二十四 寓賢

張志和 張先 蘇軾 晁補之 葉夢得

吳雲公 顧淡雲 袁去華 姚述堯 葛郊

丘密 姜夔 盧祖皋 馮去非 張輯

劉仙倫 李彭老

卷二十五

吳文英 李演 黃公紹 蔣捷 陳允平

汪元量 周密 張炎 張天雨 湯彌昌

束從周 張可久 趙由儁 王國器 倪瓚

吳寬 文璧 文彭 夏完淳

卷二十六

朱彝尊 陳維崧 毛奇齡 湯思孝 沈季友

厲鶚 陸培 龍鐸 吳錫麒 彭兆蓀

洪亮吉 唐仲冕 王昶 龍光斗 李福

楊芳燦 顧翰 項鴻祚 孫鼎烜 夏寶晉

張景祁 諸福坤

卷二十七 補人

沈自繼 沈自南 黃始 費鴻 沈廷揚

費元衡 沈霆 潘謙 沈彤 潘眉

嚴湘帆 王棠 葉蘭生 費卿榮 計棠

任廷昶 于清 張益齡 葉錦棻 沈春榮

沈 纘 閨媛 趙汝淳 寓以下賢 無名氏 鄒 銓

卷二十八 補詞

范成大 史 鑑 吳 易 沈自炳 沈永啓

沈永禋

卷二十九

葉舒胤 葉舒崇 丘 乘 沈 雄 周 銘

沈時棟 吳景果 葉舒璐

卷三十

徐達源 郭 磨 陳子諒 陳蕊元 朱瑞增

黃寶書 莊人寶 黃元芝 葉小紈 以下閨媛 沈友琴

沈御月 陸 惠

笠澤詞徵

百尺樓叢書

卷一

邑後學 陳去病輯錄

宋

謝 絳字希深祥符乙卯進士甲科

富春籍

歷官兵部員外郎擢知

制誥判吏部流內銓太常禮院出知鄧州卒贈禮部尚書有集

五十卷

去病案公父濤始由富陽遷居邑中即今同里北所稱謝里邨是

夜行船

昨夜佳期初共鬢雲低翠翹金鳳尊前和笑不成歌意偷傳眼波微  
送 草草不容成楚夢漸寒深翠簾霜重相看送到斷腸時月西斜  
畫樓鐘動

訴衷情 宮怨

銀缸夜永影長孤香草續殘爐倚屏默默無語粉淚不成珠 雙粲

枕百嬌壺憶當初君恩莫似秋葉無情欲向人疏

菩薩蠻 冬宴

娟娟侵鬢妝痕淺雙眸相娟彎如翦一瞬百般宜無端笑與啼 酒  
闌思翠被特故嘗騰地生怕促歸輪微波先注人

李山民以字行原籍洛州曲周為忠愍公若水之妖避亂來吳就

館邑中因家焉據燼餘錄

洞仙歌 題吳江橋亭

飛梁壓水虹影澄清一作清光曉橘里漁邨半烟草歎一本脫此字今來古往

物是一作換人非天地裏唯有江山不老 雨巾風帽四海誰知我一

劍橫空幾番一作回過案玉龍嘶未斷月冷波寒歸去也林屋洞天無

鑠認雲屏煙障是吾廬任滿地蒼苔年年不掃去病案此闕舊說多指為閩人林外所作

要是訛傳獨燼餘錄言之較詳似非無據故從之而并錄前人筆記二則于下備參攷焉

周密齊東野語云林外字豈鹿泉南人詞翰瀟爽談話不羈飲酒無算在上庠暇日獨游西湖幽寂處得小旗亭飲焉外美風姿角巾羽髦飄飄然神仙中人豫市虎皮錢篋數枚藏腰間每出其一命酒家保傾倒使視其數償酒值卽藏去酒且盡復出之一篋傾倒如初逮暮所飲幾斗餘不醉而篋中錢若循環無窮者肆人皆驚異之將去索筆題壁閒曰藥爐丹竈舊生涯白雲深處是吾家江城戀酒不歸去老却碧桃無限花明日都下盛傳某家酒肆有神仙至云又嘗爲垂虹亭詞所謂飛梁遏水者倒題橋下人傳爲呂翁作惟高廟識之曰是必閩人也不然何得以鎖字協顧字已而知其果外也此詞已有紀載茲不復書

葉紹翁四朝聞見錄有道裝書洞仙歌于垂虹橋者飲醉而去人疑爲呂仙傳入宮中孝宗笑曰雲屋洞天無鎖鎖與老叶韻則鎖音掃閩音也偵之果閩人林外

范成大字致能紹興甲戌進士孝宗朝累權吏部尙書參知政事

尋帥金陵以病請閑進資政殿學士領洞霄宮加大學士卒贈

少師諡文穆有石湖詞一卷

潘檉章松陵獻集范成大傳注宋史云吳郡人按宋初置平江改蘇

州後復爲平江无吳郡之名史但因成大所自署者稱之不能定其爲何縣人也而郡志以其所居石湖在吳縣境直以爲吳縣人吳江志亦列之寓賢今考石湖界吳縣吳江兩邑之間其生平篇詠在松陵者尤多則成大又當爲吳江人矣

醉落魄

棲鳥飛絕絳河綠霧星明滅燒香曳簟眠清樾花影吹笙滿地淡黃  
月好風碎竹聲如雪昭華三弄臨風咽鬢絲撩亂綸巾折涼滿北  
窗休共輓紅說

朝中措

長年心事寄林扁塵鬢已星星芳意不如水遠歸心欲與雲平留  
連一醉花殘日永雨後山明從此量船載酒莫教閒卻春情

眼兒媚 萍鄉道中乍晴臥輿中困甚小憩柳塘

酣酣日脚紫烟浮妍暖試輕裘困人天氣醉人花底午夢扶頭春  
慵恰似春塘水一片縠紋愁溶溶洩洩東風無力欲皺還休

憶秦娥

樓陰缺闌干影臥東廂月東廂月一天風露杏花如雪隔煙催漏

金蚪咽羅幃暗淡燈花結燈花結片時春夢江南天闊

霜天曉角 梅

晚晴風歇一夜春威折脈脈花疎天淡雲來去數枝雪  
勝絕愁亦絕此情誰共說惟有兩行低雁知人倚畫樓月

惜分飛 南浦舟中與江西漕帥酌別夜後忽大雪

畫戟錦車皆雅故簫鼓留連客住南浦春波莫難忘羅韞生塵處  
明日船旗應不駐且唱斷腸新句捲盡珠簾雨雪花一夜隨人去

菩薩蠻 湘東驛

客行忽到湘東驛明朝正是瀟湘客晴碧萬重雲幾時逢故人  
江南如塞北別後書難得先自雁來稀那堪春半時

滿江紅 清江風帆甚快作此與客劇飲歌之

千古東流聲捲地雲濤如屋橫浩渺檣竿十丈不勝帆腹夜雨翻江



春浦漲船頭鼓急風初熟似當年呼禹亂黃川飛梭速  
擊楫誓空  
驚俗休拊髀都生肉任炎天冰海一杯相鬪荻笋萋芽新入饌鷓絃  
鳳吹能翻曲笑人間何處似尊前添銀燭

謁金門 宜春道中野塘春水可喜有懷舊隱

塘水碧仍帶麴塵顏色泥泥穀紋無氣力東風如愛惜  
恰似越來  
溪側也有一雙鷓鷯只欠柳絲千百尺繫船春弄笛

秦樓笛 寒食日湖南提舉胡元高家席上聞琴

湘江碧故人同作湘中客湘中客東風回雁杏花寒食  
溫溫月到  
藍橋側醒心絃裏春無極春無極明朝殘夢馬嘶南陌

玉樓春 梅花

佳人無對甘幽獨竹雨松風相澡浴山深翠袖自生寒夜久玉肌元  
不粟  
却尋千樹煙江曲道骨仙風終絕俗絳裙縞袂各朝元只有

散香名萼綠

醉落魄 海棠

馬蹄塵撲春風得意笙歌逐款門不問誰家竹只揀紅妝高處燒銀  
燭 碧鷄坊裏花如屋燕王宮下花成谷不須悔唱關山曲只爲海  
棠也合來西蜀

玉樓春 牡丹

雲橫水繞芳塵陌一萬重花春拍拍藍橋仙路不崎嶇醉舞狂歌容  
倦客 眞香解語人傾國知是紫雲誰敢覓滿蹊桃李不能言分付  
仙家君莫惜

菩薩蠻 木芙蓉

冰明玉潤天然色淒涼拚作西風客不肯嫁東風殷勤霜露中 綠  
窗梳洗晚笑把一作琉璃盞斜日上妝臺酒紅和困來

醉江月 嚴子陵釣臺

浮生有幾歎歡娛常少憂愁相屬富貴功名皆由命何必區區僕僕  
燕蝠塵中鷄蟲影裏見了還追逐山間林下幾人真个幽獨 誰似  
當日嚴君故人龍袞獨抱羊裘宿試把漁竿都掉了百種千般拘束  
兩岸煙林半溪山影此處無榮辱荒臺遺像至今嗟咏不足

醉落魄

雪晴風作松梢片片輕鷗落玉樓天半褰珠箔一笛梅花吹裂凍寒  
幕 去年小獵灘山脚弓刀濕徧猶橫槊今年翻怕貂裘薄寒似去  
年人比去年覺

霜天曉角

少年豪縱袍錦團花鳳曾是京城游子馳寶馬飛金鞵 舊游渾似  
夢鬢點吳霜重多少燕情鶯意都瀉入玻璃壺

滿江紅 雨後攜家游西湖荷花盛開

柳外輕雷催幾陣雨絲飛急雷雨過半川荷氣紛融香浥弄蕊攀條  
春一笑從教水濺羅衣濕打梁州簫鼓浪花中跳魚立 山倒影雲  
千疊橫浩蕩舟如葉有采菱清些桃根雙楫忘却天涯漂泊地尊前  
不放閒愁入任碧筩十丈卷金波長鯨吸  
罨畫溪山行欲遍風蒲還舉天漸遠水雲初靜柁樓人語月色波光  
看不定玉虹橫臥金鱗舞算五湖今夜只扁舟追千古 懷往事漁  
樵侶曾共醉松江渚算一作只今年依舊一杯滄浦宇宙此身元是客  
不須悵望家何許但中秋時節好溪山皆吾土

蝶戀花

春漲一篙添水面芳草鵝兒綠滿微風岸畫舫夷猶灣百轉橫塘塔  
近依前遠 江國多寒農事晚村北村南穀雨纔耕遍秀麥連崗桑

葉賤看看嘗麪收新繭

南柯子

悵望梅花驛凝情杜若洲香雲低處有高樓可惜高樓不近木蘭舟  
緘素雙魚遠題紅片葉秋欲憑江水寄離愁江已東流那肯更西  
流

念奴嬌

吳波浮動看中流翻月半江金碧醉舞空明三萬頃不管姮娥愁寂  
指點瓊樓憑虛有路鯨背橫東極水雲飄蕩闌干丈無力家世  
回首滄洲煙波漁釣艇一作有鷗夷仙迹一笑閒身游物外來訪扁舟  
消息天上今宵人間此地我是風前客濤生殘夜魚龍驚德橫笛  
水鄉霜落望西山一寸修眉橫碧南浦潮生帆影去日落天青江白  
萬里浮雲被風吹散又被風吹積尊前歌罷滿空凝淡寒色人世

會少離多都來名利似蠅頭蟬翼贏得長亭車馬踞千古羈愁如織  
我輩情鍾匆匆相見一笑真難得明年誰健夢魂飄蕩南北

又 和徐尉游石湖

湖山如畫繫孤篷柳岸莫驚魚鳥料峭春寒花未徧先共疏梅索笑  
一夢三年松風依舊蘿月何曾老隣家相問這回眞箇歸到 綠鬢  
新點吳霜樽前強健不怕衰翁號賴有風流車馬客來覓香雲花鳥  
似我麤豪不通姓字只要銀瓶倒奔名逐利亂帆誰在天表

三登樂 四首

一碧鱗鱗橫萬里天垂吳楚四無人櫓聲自語向浮雲西下處水村  
煙樹何處繫船暮濤漲浦 正江南搖落後好山無數儘乘流興來  
便去對青燈獨自歎一生羈旅欹枕夢寒又還夜雨

路轉橫塘風捲地水肥帆飽眼雙明曠懷浩渺問菟裘無恙否天教

重到木落霧收故山更好  
還溪門休蕩槳恐驚魚鳥  
算年來識翁者少  
喜山林蹤跡在何曾  
如掃歸任鬢霜醉紅未老

今夕何期披岫幌  
寒關重啓引冰壺  
素空似洗捲簾中  
欹枕上月星浮  
水天鏡夜明半窗  
萬里 眄庭柯都老  
大樹猶如此  
六年前轉頭未幾  
喚鄰翁來話舊  
同藟新蟻秉燭夜  
闌又疑夢裏

方帽衝寒重檢校  
舊時農圃荒三徑  
不知何許但姑蘇  
臺下有蒼然平楚  
人笑此翁又來訪  
古 况五湖元自有  
扁舟祖武記滄洲  
白鷗伴侶歎年來  
孤負了一簑烟雨  
寂寞暮潮喚回棹  
去

### 浪淘沙

黯淡養花天  
小雨能慳煙  
輕雲薄有無  
閒官柳絲絲  
都綠徧猶有春  
寒 空翠濕征  
鞍馬首千山  
多情若是肯  
俱還別有玉  
杯承露冷留  
共君看

原注玉杯官舍  
中牡丹絕品也

菩薩蠻

雪林一夜收寒了東風恰向燈前到今夕是何年新春新月圓 綺

叢香霧隔猶記疏狂客留取縷金旛夜蛾相並看

澄懷錄范石湖云淳熙己亥重九與客自閭門泛舟徑橫塘宿霧  
一白垂垂欲雨至綵雲橋氛翳豁然晴日滿空風景閒美無不與  
人意會四郊刈熟露積如繚垣田家婦子著新衣略有節物挂帆  
迎越來溪潦收淵澄如行玻璃地上菱花雖瘦尙可采擷檣石  
湖叩柴荆坐千岩觀下有菊叢中大金錢一種已爛熳穠香正午熏  
入酒盃不待蕪飲已有醉意其旁丹桂二畝皆盛開多欒枝芳氣  
尤不可耐攜壺度石梁登姑蘇後臺躋攀勇往謝去巾與筇杖石  
稜草滑皆若飛步山頂正平有坳堂蘇石可列坐相傳為吳故宮  
閒臺別館所在其前湖光接松陵獨見孤塔之尖少北墨點一螺  
為崑山其後西山競秀縈青叢碧與洞庭林屋相賓大約目力踰  
百萬里具登高臨遠之勝始余使虜是日過燕山館嘗賦水調首句  
云萬里漢家使後每自和桂林云萬里漢都護成云萬里橋邊  
客明年徘徊藥市頗幸甚復再賦但有詩云年來厭把三邊  
酒此去休哦萬里詩今年幸甚復再賦但有詩云年來厭把三邊  
節於鄉山之乃復用舊韻首句云萬里吳船泊歸訪菊籬秋去  
病案此詞與前桂林成都二首都未之見惟燕山館原唱尙在集  
中故錄此節



笠澤詞徵卷一

完

卷二

邑後學 陳去病輯錄

宋

趙礪老字渭師其先東平人仕孝宗朝為書狀官隨范成大使金

歸擢正言乾道八年以右通直郎知楚州入為大理寺丞淳熙

三年由兩浙轉運副使知臨安府除祕閣修撰權工部侍郎有

拙庵雜箸三十卷外集四卷

去病案公以扈蹕南來遂家于邑東南黎里之野又案公詞夙所未

觀頃惟臨桂王鵬運刻入四印齋叢書全卷僅十餘闕愚以其孤本難得不容有所去取爰悉摭錄于此讀者幸共寶之

滿江紅

見說春時新波漲二川溶溢今底事沙痕猶褪石渠慳碧人意不須  
長作解興來便向杯中覓縱茂林修竹記山陰千年一 葭吹動春  
工畢橋上景壺中日况梅肥笋嫩雨微魚出口只恐延英催入覲不教

綠野長均逸任多情胡蝶滿園飛狂蹤跡

前調 用前韻

西郭園林湖光淨暮寒清溢明月上近環山翠遠搖天碧粉澤蘭膏  
違俗尙岩花磴蔓從誰覓問近來鐙脚許何人吾其一 歡樂事休  
教畢經後夜思前日想無心不競水流雲出物外烟霞供嘯咏箇中  
魚鳥同休逸又何須浮海訪三山尋仙跡

又

瀟灑星郎吹綠鬢勝遊霞舉秋又半月磨雲翳籟傳風語太一青藜  
光對射中流蕩漾蓮舟舞戲人間今夜水精宮前無古 吾家是蓬  
山侶歌舞袖蘋花渚儻問津斜漢乘槎南浦謁帝通明今得便素娥  
拍手心先許笑畫闌三十六宮秋花如土

念奴嬌 中秋垂虹和韻

冰蟾駕月盪寒光不見層波浸碧幾歲中秋爭得似雲捲秋聲寂寂  
多謝星郎來陪賢令快賞鰲峯極廣寒宮近素娥不靳餘力 夜久  
露落瓊漿神京歸路有雲翹前跡當日仙人曾馭氣只學神交龜息  
今夜清尊一齊分付穩是乘槎客天津重到霓裳何似聞笛

水調歌頭 和平湖

梅仙了無語拄笏看西山山涵秋曉水光磨蕩有無間自是靈襟空  
洞更望風雲吞吐浩渺白鷗閒高誦遠游賦獨立桂香闌 謾常談  
如觀水要觀瀾物情長在人生何用苦求難隨我一觴一詠任彼非  
玄非白唯放酒盃寬富貴儻來事天道管知還

永遇樂 壽葉樞密

香雪堆梅繡絲蹙柳仙館春到午夜華燈烘春豔粉月借今宵好袞  
衣搖曳簪纓閒繞共祝大椿難老望台躔明星一點冰壺表裏相照

誕彌令節欣欣物態共喜重生周召八鼎勳庸九夷姓字策杖孤  
鴻杳鷓鴣噪蘭馨松茂把酒共春一笑管如今鹽梅再夢夜鈴命  
詔

醉蓬萊 同前

聽都人歌詠便啓金甌再登元老山色溪聲與春風齊到補袞工夫  
望梅心緒見丹青重好鵲喜晴空燈迎誕夕槐堂歡笑 正是元宵  
滿天和氣璧月流光雪消寒峭今夜今年表千秋同照萬象森羅一  
區清瑩影山河多少玉燭調新彩眉常喜寰瀛春曉

記青蛇感異後日扶顛太平人瑞壯歲彈冠有經邦高志晚上文墀  
載嚴霜簡便雲龍交際紫極旋樞金蟬映袞乾坤開霽 底事當時  
飲江湖馬一望雲旗倒戈投贄此片丹心幾風聲鶴唳烟息塵收水  
明山麗只五湖相記今夜華燈火城信息千年榮貴

鷓鴣天 同前

堂上年時見燭花青氈還入舊時家芝函瑞草回春早綠野東風轉  
歲華 催召傳穩鋪沙壘尊今日棗如瓜誕辰更接傳柑宴蓮炬通  
宵喚草麻

白日青天一日明舊時勲業此時情延英再許裴公對商鼎須調傅  
說羹 千萬載輔宗祊擎天八柱愈崢嶸將軍犁卻龍庭後歲傍鼇  
山奏太平

生查子 答洪丞相謝送小冠

章甫不如人翠綰垂楊縷纖手送來時羅帕緘香霧 貂蟬嬾上頭  
渭水知何處風月共垂竿脫帽須親付

又 洪舍人用前韻索冠答謝並以冠往

朝路進賢歸厭聽歌金縷不戀玉堂花豹  
王刊作隱南山霧 漣酒

未巾時暑檻披風處子夏不兼人併與詩筒付

又 再和丞相

金門一免時離緒紛如縷想像切雲高曉日夢昏別作霧 峨冠補

袞人不是無心處欲效貢公彈衣鉢知誰付

又 再和舍人

斜日下平川樓角銷霞縷擺盡濁塵纓畫棟縈非霧 平生許子窮  
今到知音處約伴玉簪游好夢從天付

南柯子 和洪丞相約賞荷花

世上淵明酒人間陸羽茶東山無妓有蓮花隱隱仙家鷄犬路非賒  
積靄猶張幕輕雷似捲車要令長袖舞胡鞞須是簷頭新霽鵲查

查

又 和謝洪丞相送竹妝匳

體質娟娟靜花絞細細裝翠筠初得試新忙睡起鬢雲撩亂趣泉湯  
多病心常捧新詞字帶香管教塗澤到雲窗辦下謝君言語巧如  
簧

浣溪沙

嬾畫娥眉倦整冠筓苞來點鏡中鬢承恩容易報恩難  
鬢髮未饒青筓素鱗行簇水晶盤流觸元白不相干

又 和洪舍人

劉氏風流設此冠今誰將去伴珠鬢君家兄弟二俱難  
馳去請觀流汗馬釣時休等爛銀盤明朝吟詠有方干  
元

陸行直字季道一字德恭又字輔之自號壺中天又號湖天居士

一作壺天元大德中官翰林典籍去病案陸氏家譜輔之祖名元龍字怡庵嘉禾人有五子曰大聲大



同大猷大用大章大猷字雅叔號翠巖仕宋為江浙儒學提舉  
咸淳間始築別墅于分湖濱曰桃園中有翠岩亭嘉樹堂翡翠  
巢延月軒問蘆處釣魚所半畝居佚老堂樂潛丈室諸勝遂自  
號武陵主人生子四曰行中行坦行簡行直直即輔之也生于  
德祐元年乙亥大德中由人材任湖北十學士遷典籍皇慶閒  
致仕歸酷嗜法書名畫鍾繇季直表真蹟趙彝齋落水蘭亭  
尤所寶者所作碧梧蒼石圖一幅世多珍之筆意大似雲林人  
稱陸隱君焉又案輔之嘗從張玉田游深得填詞之妙因作  
詞旨其自序有云命韶作詞旨似韶蓋其異名也而明刻本詞  
旨又題陸友仁撰殊屬誤謬或據楊維禎東維子集云元松陵  
陸子敬居汾湖北壘石為山樹梅成林取姜白石詞語名其軒  
曰舊時月色以為即輔之恐未必然意者子敬係其兄行簡字  
耶姑識之以俟攷又案顧嗣立元詩選癸集云季道一作季  
衡非衡乃其子陸廣字別作季弘者是衛弘同聲而衡廣義尤  
相屬也

清平樂 題碧梧蒼石圖和張玉田韻

楚天雲斷人隔瀟湘岸往事悠悠江水漫怕聽樓前新雁 深閨舊

夢還成夢中獨記憐卿依約相思碎語夜涼桐葉聲聲

汪柯玉珊瑚網緩軒劍稽云碧梧蒼石一幅姑蘇汾湖天居士  
陸行直輔之所作行直有家妓名卿卿者以才色見稱友人張叔

夏爲作古詞贈之所謂多情因爲卿是也後二十載行直以  
翰林院典籍致政歸作此蒼石碧梧復與其宗人治仙話舊因記  
憶叔夏之贈則張公卿皆已杳隔塵世矣故并書張詞于卷端  
當時諸公仍踵而和之其詞旨抑揚悽婉似寓乎悼惜無涯之  
然自至治到今又百餘年矣而此圖無恙墨色如新豈非有類  
陽石鼓昭陵蠶紙人人得珍之耶又黃鶴山樵洞天清曉圖壺  
中題云千巖萬山白雲心自閒結屋萬山深處也分得雲半間人  
生良鮮歡世事紛紛行路難早去同尋瑤草莫把作畫圖看去病  
案此作不知何調徧檢詞律竟  
弗可得因附于此以俟知者

柳樹芳分湖小識云依綠軒在湖東元延祐三年陸行直所構架  
屋池上爲游觀之所錢重鼎識記又元翰林典籍陸行直家妓  
卿卿墓在二十九都北羽圩南陸庵左俗呼爲小娘墳  
去病案陸家譜行直亦葬北羽而南陸今名廣陽庵云

陸祖允字口口翰林典籍行直子去病案陸家譜行直九子長祖

忠六祖恭七祖和八祖肅九祖廣然則允蓋其長子也又案  
同時題水邨圖者有祖宣祖凱二人宣卽行直子凱則非其子  
姓必其羣從也觀錢重鼎依綠軒記季道爲甫里賢子孫予久  
客其門束書相隨於分湖予居其第宅東偏池上駕屋亢爽扃  
曰依綠俾二三子於焉澄懷滌慮誦詩讀書又云二三子睇流  
動而得其固有之智詠淪漪而得其自然之文因盈科而後進  
悟成章而達未必不爲藏修游息之一助然  
則錢蓋陸氏子弟之塾師而允亦其一也

菩薩蠻 題水邨圖

鐵網珊瑚趙孟頫作又云後一月德鈞持此圖

見示則已裝成軸矣一時信手塗抹乃過辱珍重如此極令人慚愧

當年圖畫知何處如今身向滄洲住吾亦愛吾廬芸牕幾卷書 青

山天際小日送飛鴻杳試問釣魚船蘆花淺水邊

錢重鼎水邨隱居記予游淮水來吳會客於季道陸翰林之字下  
近十年知其別墅在淞江之南分湖之東欲往來未能每思寬閑  
寂寞之濱得與鱸鄉蟹舍鄰接庶城市委巷偏仄之懷有所託以  
紓焉季道悉予志為卜築於其別墅之傍至則聚書其中自怡以  
悅屋前流水清激鑿毛髮居人類汲以飲時有鷗鳥舞而下若相  
忘於江湖可取以玩也異時子昂趙集賢為作水村圖林樾蔭乎  
茅屋略竹橫乎荒灣秋風鴻鴈夕陽網罟短棹延緣葦間不聞拏  
音迹其意匠圖寫於大德壬寅迄延祐甲寅十有四年景物處所  
宛然不異於今所居事固有不相期而相符若是者季道泛舟往  
來吾廬手叢書一編筆牀茶竈之風流故在明月之夜共載以游  
撫清絕之區得詠歌之趣或能追皮陸清事可乎噫余老矣方將  
卷書學釣容與於煙波之上而為之歌曰舟搖搖兮風嫋嫋兮波  
鱗鱗兮鷗翩翩兮扣舷漁歌兮孰知其他兮歌已遂書  
為水邨隱居記延祐乙卯季夏望日通川錢重鼎記

卷三

邑後學

陳去病輯錄

明

沈

韶字鳳儀

徐鉉本事詩洪武初松陵沈韶游九江登琵琶亭月夜聞歌聲明日復往亭中有麗人冉冉而至呼

韶共坐曰妾偽漢陳主婕妤鄭婉娥也年二十而死殯于亭側

隨命侍兒鈿蟬金雁取酒歌念奴嬌詞曰昨夕郎所聞也口占

一詩贈韶曰鳳艦龍舟事已空銀屏金屋夢魂中黃蘆晚日空

殘壘碧草寒煙鎖故宮隧道魚鐙油欲燼妝臺鸞鏡匣常封憑

君莫話興亡事淚溼胭脂損舊容韶答之云結綺臨春萬戶空

幾番揮淚夕陽中唐環不見新留轅漢燕猶留舊守宮別苑秋

深黃葉墜寢園春盡碧苔封自慚不是牛僧孺也向雲堦拜玉

容因相與話元末羣雄興廢及偽漢宮中事甚悉臨別以金條

脫為贈同游梁生傳其事去病案此詞與詩實皆韶所作特懼

念奴嬌

望族以坐藍玉黨夷滅殆盡然則韶殆為萬三支屬歟亦可疑也

離離禾黍歎江山似舊英雄塵土石馬銅駝荆棘裏閱遍幾番寒暑

劍戟灰飛旌旗鳥散底處尋樓舫暗鳴叱咤只今猶說西楚 憔悴

玉帳虞兮燈前掩面雙淚飛紅雨鳳輦羊車行不返九曲愁腸慢苦

梅瓣凝妝楊花翻曲一作飛雪回首成終古翠螺青黛絲仙慵畫眉嫵

徐有貞原名理字元玉宣德八年進士長洲籍官華蓋殿大學士封

武功伯謫戍雲南還自號天全翁有武功徐先生集葉紹袁湖隱外史云

武功伯徐公有貞父本蘆墟人以醫行僑居郡中公遂贅於郡為長洲諸生登進士湖固其粉鄉也去病案公與史西邨為

忘年交閒居日恆過其家多所題詠

### 千秋歲引 暮春書感

風攪柳絲雨揉花纈蚤過了清明時節新來燕子語何多老去鶯花

飛未歇秋千院蹴鞠場人蹤絕 踏青拾翠都休說是誰馬走章臺

雪是誰簫弄秦樓月從前已自無情緒可奈而今更離別一回頭人

千里腸百結

臨江仙 對景寫懷

歲歲看花看不厭與花似有姻緣一尊相對且留連花有重開日人無再少年 關情最是花閒月陰晴圓缺堪憐時光有限意無邊安得人長在花長好月長圓

滿庭芳 春日游天平山

水長新波山橫青氣朝來宿雨初晴動人清興紫翠眼中明天也教吾快活要游處便與完成最好是一峯送過又是一峯迎 有舟中絃管車前鼓吹隨飲隨行路傍人覷了還笑還驚道是神仙來也不道是箇老儒生知誰解浮沈綠野裴度晚年情

史 鑑字明古號西邨有西邨集二十一卷

蘇州府志史仲彬吳江人明建文時官翰

林侍讀學士文兼淵閣侍書帝遜位彬載歸匿於家既而入雲南帝後常至其所輒隱之不以告人一日曾孫明古生駕忽至賜名曰鑑 吳江縣志沒後帝復至適晟子生男命其名曰鑑閱致身錄泣曰彬不愧斯語矣 錢士升表忠記從亡臣傳甲

寅四月師復至其家留五日適仲彬子晟子婦生男師命其名曰鑑去病案西邨集四庫書目稱八卷附錄一卷王士禎香祖筆記謂有二十八卷今皆藏金陵圖書館思未之見此本乃其六世孫冊所輯而八世孫鱗所訂正者也繕寫精緻似係待刊之本愚於己亥秋從其裔孫得之殊堪寶也

### 長相思

花滿枝蝶滿枝客舍慙慙臥病時愁聞春鳥啼  
爲相思苦相思相別常多相見稀纒絲無了期

### 玉樓春 克振弟賞牡丹

名花綽約東風裏占斷韶華都在此芳心一片可人憐春色三分愁  
雨洗 玉人盡日慙慙地猛被笙歌驚破睡起臨妝鏡似嬌羞近日  
傷春輸與你

### 點絳脣 聞歌

春夜厭厭珠明玉瑩雙雙見惺忪言語耳畔相思怨  
對酒嬌歌覘

院流鶯轉香風扇花枝撩亂月照鞦韆院

前調 贈妓

體態妖嬈柳絲無力腰肢小向人無語似恨花開早  
薄倖不來思  
憶何時了音書杳閒愁如草滿地知多少

浣溪沙 夏夕賞蓮

水面風來晚更宜酒香荷氣水沈微誰家長笛倚樓吹  
五月梅花  
今夜落千門梧葉未秋飛不知零露濕人衣

曲水流通濯錦紅新門移轉納香風畫舟時傍彩雲中  
半夜月明  
歌楚調雙蓮波冷泣吳宮鴛鴦驚散各西東

菩薩蠻

柳腰清減花容瘦眼波凝綠眉山皺春去已多時不堪聽子規  
相逢時話舊淚濕羅衫袖對酒莫高歌聞歌愁更多  
相



憶秦娥 登保叔寺湖光寶閣

湖邊寺樓臺舊是春游地  
春游地千花張錦兩山橫翠  
西風闌檻  
秋無際青山不改朱顏異  
朱顏異斷橋殘柳伴人憔悴

少年游 題小景

青山重疊遶回溪  
空翠濕人衣  
好似嬌娥曉臨妝鏡  
石黛掃雙眉  
丹楓映水如漂錦  
秋色誤春姿  
風振華林滿空靈籟  
走上小亭時

浪淘沙 觀天魔舞

瓔珞五花冠  
雲鬢鬢霞衣  
縹帶綴琅玕  
鈴舌輕彈天樂響  
人在雲  
端  
弓樣轉彎彎  
左右回盤鏡  
光如月照孤鸞  
天女散花穿隊子  
環  
珮珊珊

望江南 閤尙溫招飲湖中

船櫂處恰是藕花洲  
別處歌聲剛得借去時  
春色那一作堪留  
花落

水空流 天漸晚臨去更回頭山翠遠如眉黛曉湖光凝似眼波秋  
越女不勝愁

臨江仙 贈余浩

秋水芙蓉江上飲憐渠無限風流紅牙低按小梁州澹雲拖急雨依  
約見江樓 最是采蓮人似玉相逢並著蓮舟唱歌歸去水悠悠清  
砧孤館夜明月太湖秋

意難忘

贈尼僧寇智璽謁汝惟弘

自注寇  
老妓也

冷落門前便出家離俗禮佛參禪鬢雲隨手落燈燄與誰傳捐翠袖  
謝花鈿風韻尙依然想少年嬌歌妙舞似夢如顛 知音曾愛曾憐  
悵雲飛雨散月暗花孱青衫應有淚錦帳已無緣相見後兩無言不  
忍話當年試問聲西湖琴操誰後誰先

水調歌頭 聞歌有感

往昔月明夜把酒聽渠歌妝成窈窕模樣翠袖影金荷最是美人年  
少賓客滿堂歡笑花豔照衣羅紅錦地衣縐齊看舞天魔 從別後  
歡樂事盡消磨相逢纔是憔悴重爲唱那何任有引商刻羽一似貫  
珠縈縷都變淚痕多珍重出門去江上渺烟波

滿庭芳 題狀元紅桂花

粟染丹砂枝繚碧玉天工應與多情冠黃魁白高占狀元名好像宮  
袍賜出動人處照眼霞明多應是瓊林宴罷露酒未曾醒 吳剛何  
處見廣寒宮裏舊與花盟一枝攀入手更有誰爭但覺天香滿袖風  
露重步步雲生從今去杏花紅處領著衆人行

水龍吟 錢塘

錢塘自古繁華憶去年一春游遍山明水麗花嬌柳娜流鶯百啣滿  
路笙歌幾船簫鼓往來游宴正晚來堪賞酒闌人散有明月相留戀

別後事更多變悵重游可憐無便人面已非桃花依舊劉郎不見  
光景星飛風流雲散悶懷誰遣歎人生不向少年行樂老來空羨

金菊對芙蓉 雁蕩

雁蕩名山蓉邨勝境天教妝點東甌有東西天柱大小龍湫下臨滄  
海如無地疑大水晝夜常浮筆峯長卓石旂猶展萬古千秋 何日  
拂袖南游任窮探極覽未肯回頭直除非跨鶴東訪瀛洲海波清淺  
揚塵起等閒見石屋添籌此時方始歸來儘拚做了貂裘

百字令 劉邦彥招飲竹東館賞桂花

竹東莊上記當年春盡歸舟曾歇莫雨和風催客去猛地作時還輟  
小館茶香行廚酒盡執手難爲別歸家南望寸腸幾度千結 誰道  
買棹重游主人情重罇俎依前設桂樹團香纖月露漸近中秋時節  
試問嫦娥今年才子誰把高枝折夜深無語霏霏滿地金屑

木蘭花慢 漁隱爲沈廷器賦

年來多水旱苦耕稼久無收且覓取綸竿尋將釣線走上漁舟滿前  
山青水綠似生綃畫采漾中流風起停槎古渡月明鼓柁滄洲 桐  
江千古水悠悠何處覓羊裘但釣得魚來沽將酒去痛飲爲謀醉來  
幕天席地把蓑衣蓋了臥船頭要識其中樂趣除非請問沙鷗

賀新郎 天台

問道天台路洞門深瑤草長青桃花無數仙子雲鬟低欲墮倚石迷  
花凝竚憶劉阮當年曾遇霧帳雲房深幾許夢魂中不管流年度緣  
分淺又歸去 於今路斷無尋處惟舊時華頂依然霞城如故古寺  
石橋風雨響瀉下半年瀑布有頭白老僧常住世上名山能有幾強  
登臨莫待青春暮婚嫁畢聽分付

玉女搖仙珮 中原

神州赤縣盡在中原知是幾遭分割洛邑王城秦關天府形勝儼然  
依舊算隋隄楊柳杵風流怎及孔林長久歎往日英雄何在野艸閑  
花不堪回首天開我皇明四海一家民安物阜况乃岱宗孕秀嵩  
嶽降神河水盤迴左右太華終南恆山王屋總是神仙淵藪故人同  
去否且莫管家計誰無誰有趁早早膏車秣馬東馳西上登山臨水  
相携手休教落在他人後

解連環 送別

銷魂時候正落花成陣可人分手縱臨別重訂佳期恐軟語無憑盛  
歡難又雨外春山會人意與眉交皺望行舟漸隱恨殺當年手栽楊  
柳別離事人生常有底何須爲着成个消瘦但若是兩情長便海  
角天涯等是相守潮水西流肯寄我鯉魚雙否倘明年來游燈市爲  
儂沽酒去病案此調下半段起句多作六字但若是句則七字惟美  
成一首六字史詞疑卽本此但仍有出入不知何也又兩字

原作下年原作  
歲今從王詞綜

蘭陵王 與張子靜李貞伯朱岐鳳汝其通賞芍藥

曲池北紅葉盈盈半牀傷春重情惹思牽困倚東風倦無力無言自  
脈脈恨殺春歸似客斜陽裏勾蝶引蜂應與東君送行色 維揚舊  
踪跡有圍帶欺黃盤盃妬白傾城諫賞馳油壁嗟物與時忤世隨人  
換而今名勝久寂寂受多少悽惻 堪惜易狼籍且露飲花前醉臥  
花側夜深花露沾衣濕便日下登對省中輪直當階翻處料此會須  
記憶

瑞龍吟 水月觀賞牡丹

春消息開遍紅紫芳菲粉香狼籍慳留傾國名花那般富貴真成弟  
一 自矜惜如箇美人初覺染香勻色清晨卯酒微酣怨紅啼素重  
重暈積 天寶君王妃子妬妍爭寵沈香亭北歡賞未終漁陽鼙鼓

聲急清平古調惟有天仙筆誰知道張油命酒按花評格也許吾儕  
得晚來小雨催花坼轉覺嬌無力風露下偏生橫斜欹仄倩人扶起

載傾餘瀝

吳江縣志史仲彬傳遂載帝泛江抵家奉居清遠軒帝改題水月  
觀親篆刻木因聞積慶寺鐘聲賦詩曰細雨披楊起綠烟水紋如  
織影迷簾午鐘何處偏  
來耳不似西宮奏管絃

史氏吳中派文獻譜溱陽張羽題水月觀漠漠復依依羅房畫掩  
扉凝衾學飛絮拂桁亂成衣未肯從龍出應從化蝶飛彩文低幔

影溼雷和爐罪觸石濃兼淡為霖去復歸却憐塵土夢空繞畫屏  
題又邑人葉舒胤瞻惠宗讓皇帝所書史氏水月觀小雅堂扁額

清遠西軒對夕曛裂裳曾坐出亡君到今劫燼灰飛後御篆還看  
鐵線文三百年前小雅堂幾經春霧共秋霜休嗟人物通靈去夜

夜同涵水月光又莊觀詩回首周原歎黍離故家猶貯舊綸絲河  
山無恙甘高蹈水月欣題寄遠思已是翠華光赫奕難忘綠字墨

淋漓後人擁護寧虧損未減先臣扈蹕時三百年來感闕文從亡  
軼事敢輕論誰疑汲冢書難信應見靈光蹟獨存三顧衡茅知主

眷兩題綽楔總君恩睡龍灣上斜陽外時有祥光覆里門又金源  
琦詩聽說從亡智罕倫拜瞻宸翰益傷神主臣去國千秋恨水月

留題奔禩珍寂寂故宮悲蔓草聲聲杜宇泣  
殘春回思靖難今何在不及淋瀝御墨新



吳 洪字禹疇號立齋成化十一年乙未進士歷官南京刑部尙

書卒贈少保

去病案公弘治中官太僕卿時嘗與禮部尙書長洲吳

玉汝吏部侍郎吳縣王濟之詩酒唱和立五同會五同者同時同鄉同朝同志同道也亦曰同會者五人耳少保因囑越人丁綵繪圖五家各藏其一於是原博序之濟之題詩其後所謂鄉邦自昔誰同會人事從來苦不齊是也今諸家所藏或亡或燬惟徐虹亭太史嘗藏一卷蓋少保當年物也今亦不知何往矣聞吳門吳郁生曾于京師琉璃廠得一卷疑即虹亭舊藏云

朝中措 題五同會圖

蒼顏綠鬢並吳儂五老一尊同要識歲寒心事疎梅瘦竹長松 鷓

行鷺序肩隨好談笑漫從容但願人生長久年年得似圖中

前調 壽王濟之

五湖煙水百花洲風月漾扁舟共羨山中宰相清時嘯傲林丘 名

園綠水春無價怡老足觥籌眉壽年年今日冰壺玉鑑橫秋

早梅芳

柳將眠桃欲笑又是清明到玉河冰泮無數金魚弄池藻聯車油碧  
軟並馬絲鞭裊喜鳳城麗景游覽趁春曉望瀛洲紛翠葆花滿瓊  
華島玉竦西去金碧觚棱聳雲表散衙常過午下直須歸早更相期  
提壺同藉草

定風波 寄史明古

抖擻初衣未化緇此心只有故人知却悔溪堂分袂易悞我軟紅塵  
裏去多時八測塘前沽酒店三高祠下釣魚磯便與先生尋舊社  
北郭西邨有約莫遲疑去病案公又有客中和明古詩云一尊誰與  
盍朋簪又見空階覆綠陰草色不消游子恨  
月光偏照故人心霜前白雁音書在雨外青山別路深安得攜琴溪  
上去社中重覓舊知音蓋公少爲明古所識拔館之於家故詞翰往  
還多記宿昔之雅

臨江仙 虎丘同濟之作

愛此雲巖林壑美機鞢藤杖追遊生公臺下鶴泉浮與君成一老譚

笑亦風流 臺閣功名歸去好便應醉枕糟丘不須含笑看吳鉤  
苔花還繡壁波冷蟄龍湫

減字木蘭花

雪花飄了待得梅花來索笑雪白梅香看盡千林興倍長 扶筇散步拾得灞橋清絕句歲歲年年梅雪催人到酒邊

沁園春

莎徑吟蛩葭汀叫鴈秋氣悲哉正江天淒黯斜陽一抹亭皋搖落亂葉千堆露溼吟鞭風欹醉帽試與登臨覽勝來憑高望見江流九曲似我腸迴 幾年南北塵埃漫贏得吳霜兩鬢催憶晚香籬畔依然陶菊暗香林下好在逋梅跌宕琴尊評量風月已辦浮蛆漱灑杯吾歸也喚沙頭小艇直下長淮

風入松

秋江處處是丹楓映芙蓉年年夢繞鱸鄉路今朝纔見秋容釣雪灘  
頭撥櫂垂虹亭角拖筇生綃一幅翦吳淞煙景空濛綠簑青笠橫  
江去數聲長笛臨風好語眠沙鷗鷺可容添箇漁翁

笠澤詞徵卷三

完

卷四

邑後學 陳去病輯錄

明

趙寬字栗夫號半江成化十七年辛丑進士第一歷官刑部郎

中出為廣東按察使有半江集

去病案先生為吳公匏庵首拔士且係同鄉榜發公車咸疑其

有私而公實未知也乃大會賓客命寬即席作玉延亭賦文不加點頃刻而就觀者始驚異帖服玉延者山藥也吳公嘗曰不遇吳寬爭得趙寬蓋二公名適相同也

減字木蘭花 姚江阻雨

黑集作寒

風吹水水拍船頭行復止

集作微波皴作魚鱗起今並參沈天羽草堂詞

白雨橫秋

秋色蕭條沈作森

動客愁

疎鐘何處知在前村黃葉樹茅屋誰家荒

徑無人菊自花

蝶戀花 題花鳥圖

香雨新施膏沐了睡思嘗贈不管雕闌曉宿酒漸消紅暈小夢魂何處巫山杳無數間關枝上鳥報與花神昨夜春多少驚起無言情悄悄腰肢又被東風惱

滿庭芳 早起納涼

梅雨初收荷風微扇早涼庭院無塵林霽開處紅日上城闌任我科頭箕踞悠然坐細草如茵誰相伴此時瀟灑玉塵白綸巾高齋新卜築遶門流水魚鳥親人愛江湖浪迹軒冕閒身但苦青雲丹詔相催促未許沈淪休孤負吳淞好景少住待鱸蓴

水調歌頭 夜宿玉虛宮

夜賦懷仙詠曉入洞天游人閒有許奇絕真是到丹丘行盡青山落日又上碧天明月依約見璫樓玉柱九千仞空翠壓雙眸軒轅氏六龍馭此淹留靈光萬古長在塵世自悠悠望入紫雲深處環列霓

旌羽蓋泱泱異香浮乞我飛霞珮流彩照瀛洲

沁園春 秋山訪隱

藜杖敲雲荷衣浥露斜抱絲桐問釣臺何處鹿門無恙心隨流水日  
送飛鴻宇微微霄林含餘靄墅外秋光自不同行還憩過三叉路口  
萬里橋東 幽人茅屋山中白首淹留桂樹叢望丹崖青壁萬尋千  
疊石頭有路一逕纔通軒冕虛花身心實用何事驅馳任轉蓬如相  
見願執鞭爲後沒齒從公

周 用字行之號白川弘治壬戌進士累官吏部尙書諡恭肅有

全集十六卷

去病案公藝事兼長十齡能畫長師石田得其指授尤工寫牛不減史道碩厲歸真而經濟文章冠

絕一代真古之全才也

訴衷情 寄友

人閒何處有丹邱曾到太湖頭日高主人猶臥花影滿重樓 尋畫



史接詩流老滄洲一村烟樹數家茅屋幾箇漁舟

漁家傲 得家信

冷薄衣羅官署曉絲絲雨脚青梅小黑髮鏡中知漸少漁家傲五湖  
白浪幽鷗鳥 借問天公何太巧暗將歲月催人老底事放衙今日  
早人傳道家鄉三月書來了

滿路花 春暮

風前滿地花雨後連天草今年三月裏春歸早低雲薄霧猶自憐清  
曉金樽須更倒無奈離愁爲他轉傷懷抱 繡簾斜捲書靜聞啼鳥  
韶華剛九十勾銷了綠波無賴點點青荷小寄語春知道桃李多情  
莫教惜春人老

滿庭芳 壽言之弟

日麗瑤京風和錦里平安兩字頻傳別來明月三十六迴圓恰是禁

烟時候清溪上華尊堂前香霧醒緋桃翠柳妝點豔陽天 年年逢  
此日輕羅初試佳句新編有兒孫黃卷家世青氍待紀清朝盛事者  
英會滿座名賢且相約百三十歲再數甲辰年

喜遷鶯 發牛首山

登登天闕問禪宮猶是六朝遺物卅載同游一時回首依舊烟厓雲  
壁見說獻花巖裏尙有懶融殘雪都分付與今來古往酒豪詩傑  
清徹舒望眼萬里秋空草樹天香發大歷編年中山墨本無奈字碑  
磨滅且倩扶桑白日晞我滿頭黃髮更相約躡龍山絕頂劇談風月

百字令 中秋咏月次鍾石韻

中秋三五悄依稀猶是去年風物雲捲青霄開夕殿一色瑤階銀壁  
萬斛天香千尋仙桂下界霏丹雪岩嶢驚嶺聊讓唐人稱傑 堪愛  
更漏聲沉明河影澹特地清輝發天許嫦娥呈素面半點綠烟都滅

肅肅冰綃玲玲玉珮冉冉垂雲髮問儂何事家家今夜圓月都人拜以

月爲  
圓月

一剪梅 丙午八月望日

畫船鏡吹下揚州十里回頭千里回頭燕山迢遞百花洲一度中秋  
幾度中秋 遙天今夜片雲收風也無愁雨也無愁憑高不減少年  
遊酒滿南樓月滿南樓

百字令 送簡少司馬次鍾石韻

中原舊日作霖雨長養太平民物聊向鄢陵驅鐵騎推破幾重堅壁  
九棘寒凝五兵光淬歷歷皆冰雪天王明聖暫時顛倒豪傑 無奈  
揚子江邊石頭城下聽棹歌齊發百尺樓船領北風望中煙樹明滅  
徙倚三台丁寧兩鬢且莫生華髮中秋此夜故人千里明月

江城子

江城子夜聽吳歌夜如何月華多水穀粼粼纈眼混金波人世百年  
如一夢懷往事幾經過 不論歲月久銷磨鬢毛皤醉顏酡更漏沈  
沈白露濕星河怪底游仙招未得費長哦

### 小重山

江上雙峯擁翠鬢新詞合賦小重山芳泉斜逗玉龍灣清鏡裏和影  
弄潺湲 蹤跡落人間眼中知己少且偷閒憂時陡覺帶圍寬分付  
我高臥且加餐

### 清平樂

檀槽絃索一曲清平樂日色瞳瞳花影薄試暖春光先覺 重重繡  
幙羅幃風輕燕子交飛蚤晚書來問訊東山開過薔薇

吳 山字靜之號訥庵尙書洪子正德三年戊辰進士歷官河南  
四川巡撫刑部尙書隆慶初贈少保謚忠襄人稱世尙書

清平樂 滕王閣

秋光如許雁字排空去十二闌干凝眺處簾捲西山暮雨 白沙翠

竹柴門落霞孤鶩江村況是亭皋葉下蕭蕭最愴吟魂

停歌罷舞俯仰成今古感慨不須題短句誰似三王詞賦 秋屏翠

掃朝暎仙人鐵柱長存休問滕王遺事蝶羅銷盡香痕

一剪梅 出巡駐贛州

玉帳牙旗控上游粵嶠烟收閩嶠烟收毬門鏡吹轉山陬昨日汀州  
今日虔州 鬱孤臺上試凝眸章水分流貢水分流滄江如練雁橫  
秋欲辦歸舟難辦歸舟

吳邦楨字子寧號仰峯忠襄公山子嘉靖癸丑進士官太僕寺卿

虞美人

西溪十里漁邨路猶記看梅處暗香疏影最關情更憐雪外一枝橫

雨初晴 而今別去梅花久梅好應如舊風霜媿我漸蒼顏長教老  
鶴怨空山幾時還

沈一泉名佚以字行

沈雄柳塘詞話王父一泉公過姚山訪白陽山人白陽贈以詩云重重煙樹鎖招提野客

來尋路不迷纔過石橋塵又隔落花無數鳥爭啼作壁窠書併咏松浣溪紗以為壽王父作三臺令以答之云今閱喪亂後而得手蹟于大覺寺僧家幸也

三臺令 答陳白陽

酒在孤斟不碎客來共憩無譁薄業垂楊江岸一聲橫竹漁家

袁 黃字坤儀號了凡萬歷十四年進士

嘉善籍

官兵部郎中有兩

行齋集

葉紹袁湖隱外史云公祖籍蘆墟人後絲嘉善遷分復遷趙田學究義文理參孔孟圖書精蘊識緯奇秘靡

不窮原物始探本象先旁及飛壬遁甲金丹鼎炁五花八陣絳旗石磬京房李邵之占巫彭岐伯之術陰符玄女之籙鷄摩鹿一代之文各臻至境咸析要歸洵

鷓鴣天 題邨叟屋壁

數登烟林散翠鬟莫嫌此地少青山酒逢社日添酬應花到開時費

往還 松老大竹平安柴門雖設不曾關旁人方訝茅齋窄鶴柵蜂

房割半閒

沈自徵字君庸太學生崇禎初辟賢良方正不就 朱熹尊靜志居詩話云沈氏多

才自詞隱生環訂正九宮譜為審音者所宗君庸亦善填詞所撰鞭歌妓瀾亭秋諸雜劇慨當以慷世有續錄鬼簿者當目為

第一流 徐鉉詞苑叢談自徵負才任俠所著瀾亭秋鞭歌伎簪花髻詞三齣名漁陽三弄與徐文長並傳 去病案沈氏研

精騷雅早在宋季自時齋先生著樂府指迷遂開填詞捷徑為學者所宗及詞隱先生出而後音韻益協洵乎其為詞苑之功

臣也願其詞屢求未得余甚憾焉因附記于此以質博雅

鳳皇臺上憶吹簫 閱古今名媛詩集

霧鎖春風烟埋秋月一生心事全休恰雨窗弔古檢點鴛儔多少名

姝珠淚虛染就錦筆銀鈎傷情處金環不見玉葉空留 擡頭斜陽

荒塚原來是綺閣妝樓悵塵緣雖破夢境難收說甚裁雲好手也幾

度驚徹鷄籌沈吟久知音罕嗣若個能酬

周永年字安期恭肅公用曾孫諸生有懷響齋詞一卷

柳塘詞話安期以博

洽著名冢宰白川之孫固世其家學者虞山錢氏撰列朝詩選從中補輯與有力焉著詞規未竟而歿懷響齋詞如宿雨揩磨新月色晚風擡舉好花枝新豔如是

山花子 夏夜

低髻攏花夢半醒重携枕簟向閒庭何處玉簫風送遠倚闌聽趁  
著螢光看絡緯卷開蛛網放蜻蜓不是夜長愁不寐候雙星。



笠澤詞徵卷四

完

卷五

邑後學 陳去病輯錄

明

葉紹袁字仲韶號鴻振自號天寥道人又號粟庵天啓乙丑進士

官工部虞衡司主事明亡遁爲僧號華桐流衲木拂著有欄塵

天寥二集

梅墩詞話水部詞偶見其浣溪沙云銀粉畫雲乾蝶

眉青先輩遂有此新豔過人之句其詞三十三首名遷聊集

去病案公所著本富惜盡亡佚莫由窺其全豹茲特從半不軒

浣溪沙

仙仙十三四時即羈跡秦淮將有錦江玉壘之行遠

望故鄉淒其掩泣真所云侯門一入深如海也余甚傷焉今

年十七又作巫山神女向楚王臺下去矣酒間聞之悵然感

懷

一片歸雲詞苑叢望也休西陵千里水東流杜鵑芳草楚天秋老

去未消風月恨閒來重結雨雲愁欲緘雙淚寄亭州

金粉傷情別石頭六朝烟柳繫離愁破瓜人泣仲宣樓桃葉渡邊

春易去梅花笛裏夢難留子規斜月一悠悠

前調 侍女隨春年十三四卽有玉質肌凝積雪韻彷彿華笑

盼之餘風情飛逗瓊章極喜之爲作浣溪沙詞昭齊蕙綢宛

君均和之余亦作二闋

初總銀篦攏鬢輕添香朝拂美人屏生來面腆自風情淺罨翠分

明月雁小檀黃入曉春鶯故憐斜撥學新箏

紅袖垂鬢旖旎輕闌干閒倚杏花屏半將嗔語寄深情金釧粉痕

香畫鳳玉釵脂膩滑流鶯坐來簾下卽彈箏

水龍吟 寫懷

寂寥蘋渚蘅皋道書讀罷香銷篆松聲入坐藥欄紅亞美人蕉釧極  
日平蕪天高水遠蓮歌游遍且藤壺汲煮青衣小袖點取鳳團香片  
自把秋棠手洗粉牆西翠梳新鈿開簾風動畫屏琴石輕陰滿扇  
挹酒盈尊摘花侵暝夜涼迎面更堪娛又有椒篇絮句麗詞常見

水龍吟 癸酉雨中追悼亡女

素屏人正悽涼那堪日更黃梅雨蘚文侵壁曲欄低鎖煙橫平浦溟  
溟濛濛瀟瀟淅淅淚絲如許自飛瓊去後啼鵲袖上還過散空千縷  
脈脈悲傷縈緒又驚看艾懸重午繡幃香冷碧天雲杳斷腸誰語  
浴罷芳華繫成綵線遽分今古漫凝思祇見桐花落盡隔簾無數

前調

書閑芸卷蕭然閉門寂寞聽風雨榴脂鈿老濕鶯啼遍暗愁難數夜  
月梅梢粉牆竹影霎時寒暑嘆掌中珠隕千憐萬惜博得淚痕一縷

那日彩雲化去飄殘謝雪空如堵而今却又荼蘼開罷落英紛許

半載離魂三更幽夢欲尋還阻總傷情只有香箋錦字漫留仙譜君晦

有此二閱瓊章手錄之書猶在篋也簡及感賦即用君晦韻

前調 內人有此調兩閱秋懷感舊之作也丙子除夕和韻作

之

斜陽落去西風歲除光景渾如舊疎花半吐迎春未藥黯然衰柳屏  
榭生塵衫襟漬淚今宵還又想當時故跡餘香猶在銷凝幾番回首  
休問泥金圖燕柴門燎火松燔繡紗牕冷淡小庭寥寂鎖殘眉皺  
荒艸沿堦暝烟繚樹斷魂時候但空存綠卷清樽桐引哀絃難奏

前調 丁丑元旦

爆聲喧動寒村曉霞入戶瞳瞳逗蒿床驚起芸匭人遠九疑湘岫晴  
雁南飛輕帆東漾湖滸壯懷消透悵妝簾蛸網菱花閉影贏得庾郎

清瘦 况是蓼莪句掩遺杯剩縷應知否柔腸攪盡夢迴天杳昨宵  
更漏鈿折釵分何年重與屠蘇泛酒愴追尋筆冷椒華那禁潛潛沾

袖

徐鉉本事詩葉紹袁午夢堂除夕紀夢詩云除日江汀萬戶煙寒  
風蕭瑟凍雲天一聲爆竹催春色盡對流光逐送年年去年來長  
嘆息去年腸斷今沾臆疎香閣下舊枝斜曲欄珠箔渾相識相識  
相悲書閣人繡簾無復步生塵蕭蕭午晝蕉心雨寂寂殘宵桂影  
春春晝春宵何太促幾回淚點苔痕綠忽從昨夜夢魂還開幃驚  
見花顏玉細語低呼眺臚柔肌倦怯袖雙扶重來翠篔簹芙蓉幃  
亟索紅紅香茵茵燼燼燒沉水輕煙舉火齊瓊漿小婢煮雲鬢粉  
玉姿紅櫻唇歷歷分明語初向妝臺憶蕙綢斷霞遙泣鴈行秋可  
憐未識昭齊去猶問梨花夜月愁夜月梨花人已矣瑤池咫尺三  
千里對言明歲碧桃開玄都人又歸來爾姊妹心傷兩地飛青春  
弱女竟誰依鵲魂欲冷荒山月蝶夢空留金縷衣幸有恩深始母  
在含情含思嬌憐愛光碧庭前並看花蕊珠宮內雙描黛蕊珠金  
闕又分離始託心詞寄母知還待北堂妝罷後共挑西燭夜深時  
夜夜朝朝休再別清樽聚話重娛悅黃梁一枕夢魂驚紗窗猶剩  
燈明滅明滅殘燈夜未央羅衾空怨五更  
霜起來哭向靈几處淚染黃雲送夕陽

吳 易字日生號惕庵太僕卿邦植孫崇禎癸未進士授兵部職

滿江紅 和王昭儀

回首昭陽千里外，愁雲凝色。那堪憶蛾眉，初入承恩瑤闕。畫鳳殷勤，團扇底，當熊宛轉。金輿側，歎帝城烟景，入悲笳容華歇。驪山恨終難滅。青冢怨何須說。對新齋清磬，暗沾襟血。苦竹春迷，瑤瑟雨衰，蘭秋老。銅仙月願，化爲綵石，補還他乾坤缺。

滿庭芳 七月八日夜作

靈鵲初回，飛梁乍拆，商飈還湧。層波人問，天上會少總離，多多少少。天  
台花謝，一作榭楚宮冷，雲雨模糊，斷腸甚。篁枯絃絕，清淚滿蒼梧。新  
愁從此夜，一歡成夢，後約蹉跎。恨天公，懵懂情種，偏磨更恨機中素  
手空。憔悴雲錦魚梭，待借取女媧木石，銜血去填河。

渡江雲 中秋無月

喚吳剛何在，憑將玉斧爲我，掃豐隆。道天公老去，愁見今秋，不比往

時同興亡滿眼齊州恨九點烟空那堪照秦關漢苑楚殿與吳宮  
朦朧銀河影沒珠斗光收深鎖霓裳夢最斷魂繞枝驚鵲失侶哀鴻  
何年赴瓊樓舊約橫鐵笛翳鳳驂龍挽東海爲伊洗出瞳矓

摸魚兒 浙江潮

問天吳鞭江驅澥爲誰簸弄如許一絲練影搖天末瞬息魚龍嘯舞  
流傳誤道白馬素車果否英雄怒訇訇雷鼓看銀闕鯨翻雪山鼇碎  
瑤島飛仙墮 傷心事斷送趙郎殘祚鷗夷巨手何處霸圖牛斗曾  
雄踞氣壓迴瀾萬弩今又古只恐怕蓬萊清淺迷歸路歸時記取有  
精衛心癡麻姑眼老桑澥幾朝暮

賀新郎 九日

身世今如此甚重陽正逢陽九劫灰飛墜愁雨驕雲天欲暝孤館海  
涯愁寄縱滿目千崖秋霽紅萼黃英堪鬪豔儘登臨只送新亭淚千



斛酒怎堪醉 龍山嘲詠成何事儘英雄彭城歌舞金釵鐵騎揮霍  
燕秦如電掃萬里鷹揚虎視問江左霸才何處簡盡紛紛南北史算  
神州離合渾難據江水咽向東注

滿江紅 除夕丹陽道中

地坼天摧孤臣恨渡江孤楫堪此夜吞聲相對椒花柏葉十七年間  
宵與肝三千里外陵和闕想明朝新厯舊江山迴腸裂 赤眉翦南  
陽業黃巾盪中山傑看金陵王氣漢家隆準倚劍崑崙封豕骨洗兵  
星海長鯨血取大讎函首告先皇雲臺烈

水調歌頭 北固亭

千載孤亭在萬里大江流風飄雨打何處去瑜亮孫劉共道寄奴蓋  
世可惜燕秦拱手粉碎擲神州問虎吞龍門六代有人不 酒可飲  
兵可用志難酬橫戈躍馬甚時了國恥君讎畫裏金山鐵甕夢裏雲

臺麟閣身世兩沈浮青青看不倦爭奈濕雙眸

念奴嬌 渡江雪霽

江天一派初日霽萬樹千山爭白銀甲霜戈渾認作縞素三軍橫列  
薪膽君臣釜舟將士灑盡傷時血中原何在問中流古今楫 回首  
北固金焦晴光如畫拱帶金陵業虎踞龍蟠都不信此日乾坤分裂  
席卷嶠秦長驅幽薊試取中興烈妙高臺上他年浩歌一闋

水龍吟 廣陵夜泊

繁華自古揚州江流東去風流換蕪城草滿瓊臺花謝迷樓人散鼓  
角聲邊旌旗影外暮雲零亂歎興亡多少英雄束手傷心處從頭看  
二十四橋隄畔傍垂楊孤舟短纜胸中湖海要起百尺元龍誰喚  
酣眼橫斜天南地北歸鴻唳斷漫狂歌一陣斜風急雨漏沈燈暗

木蘭花慢 淮陰懷古

清淮天共水數往事幾雌雄想國士登壇王孫進食枉殺重瞳男兒  
爲知己死又何妨鳥盡便藏弓熱鬧神鴉社鼓蒼涼漢殿齊宮 霸  
才王佐逐飛蓬成敗總朦朧歎錄錄田橫匆匆士雅草草元龍荒臺  
是劉伶土好澆他杯酒對春風嘯斷孤城夜月夢回古寺晨鐘

金縷曲 戲馬臺

九曲黃河瀉似重瞳風流豪宕美人駿馬騫澗注坡三十萬蓋世喑  
嗚叱咤目斷處高邱浩野成敗難平廣武歎儘紛紛豎子王和霸君  
莫笑拔山者 卯金龍種堪無價下梢頭使君匕箸寄奴田舍玉帳  
茱萸歌吹滿舊楚樓船臺榭對寂寞山川圖畫鬪虎英雄爭鹿地付  
鳥雕赤兔漁樵話藉草坐淚盈把

沁園春 病憶家園

匹馬驅馳滿眼烽烟撲面塵埃歎日邊夸父鄧林餘恨海中精衛木

石空哀潘鬢添絲沈腰寬帶豈爲傷春病酒哉憑誰訴只孤琴對月  
雄劍鳴雷 東湖瀟灑茅齋正水曲山橫傍淺涯憶短衣角射晴雲  
落雁長箋門句午夜銜杯修竹千竿新松數尺小徑還應長綠苔悵  
望我有多情猿鶴野老須來

賀新郎 寄懷史弱翁孫君昌趙少文吳扶九包驚幾

事業那堪說似當年隆中過從鄴中歌答高論興亡先後著從古兩  
三豪傑轉盼裏山河橫裂獨向司州深夜舞耍長驅直搗心如鐵勸  
杜宇莫啼血 樹猶如此人悲切竟何年披榛灑掃漢家陵闕拋却  
中原渾不問微管其如被髮歎江左諸君英絕慘澹魚龍風雷怒算  
神州到底難合誰隻手補天缺

春從天上來

有箇惺惺記雲鞦春鬢波翦秋晴哀彈麗曲噉噉流鶯筆走錦字蛇

驚憶挑燈丙夜翻青史評判豪英兩心期待功成拂袖梅墅蓴汀  
驀然江湖風景悵柳拂章臺憔悴青青是耶非耶樓空人去夢語嗚  
咽悲凝縱成灰心事多情債浩劫魂縈恁飄零韋郎兩世杜牧三生

念奴嬌

蓬壺舊約歎滄溟塵起赤霄無際一墮人間迷歸路空灑神州血淚  
鐵馬嘶星彫戈枕露慘澹中流逝年華過眼笑人何限鄧禹 苦恨  
興廢匆匆黃金白髮短盡男兒氣半餉青瓷終古夢漫道可人強意  
江漢沈碑祁連起家衰草斜陽裏千年老鶴唳斷點烟杯水

浪淘沙 臨刑絕命

落魄少年場說霸論王金鞭玉轡拂垂楊劍客屠沽連騎去喚取紅  
妝 歌笑酒罍旁筑擊高陽彎弓醉裏射天狼瞥眼神州何處在半  
枕黃梁

成敗判英雄史筆朦朧興吳霸越事匆匆畫墨凌烟能幾個人虎人

龍 雙鬢酒杯中身世萍蓬半窗斜月透西風夢裏邯鄲還說夢驀

地晨鐘

沈雄柳塘詞話明季惕庵西郊較射使讀其東湖雜感云深宮醉舞夜敵國臥薪時想見其有心斯世惕庵服上刑武林僧名敬然者乞遺骸于張撫軍葬菜園中為位哭之歲時供以麥飯猶傳其浪淘沙絕命詞成敗論英雄史筆朦朧云云

沈自炳字君晦號聞華自徵弟恩貢生薦授中書舍人有丹棘堂

集 去病案公與其兄君庸輩咸以詞翰著稱江左而倚聲尤擅勝場又與同邑舉人孫兆奎佐吳公起義汾湖一旅東南特

若重鎮卒以師潰從彭咸之所居哀哉丹棘集世未之見茲就歷代詞選詞綜詞匯輯得數閱亦可喜也

南歌子

翠樹沾纖雨朱樓滿夕陽玉闌干繞曲池塘蓮葉小蜓飛貼水鴛鴦

清平調

夜隨鳳輦上林園珠翠風多笑語誼星映薔薇花影暗玉娥潛戲小

黃門

浣溪沙 秋閨

月照紅蕉翠檻清銀缸悄悄篆烟輕強拈繡帖疑帕耐深更獨解鸞  
襦偎繡被寒蛩泣露一聲聲玉階和雨到天明

中興樂

芙蓉池上露初涼桐花月轉迴廊秋滿紋簾詞匯作蓮籌弧燈漏長夢

入紅樓詞匯作花庭畫牆見蕭娘覺來枕畔玉釵猶響無限思量

更漏子

憶情詞匯作佳人南浦去携手何人低語眉樣淺翠衣輕鶯啼畫舫行

香閨掩珠帷歛春剩楊花千點愁不禁黯銷魂黃昏獨倚門

玉樓春 秋怨歷代詞選作燕來

吟盡一作定玉郎離別處空剩紫騮芳草路年年同嫁與東風只有小

樓紅杏樹 愁病懨懨魂欲去 一霎芭蕉寒響聚 空嗟薄命玉容人  
值得數聲秋夜雨

虞美人 春景

竹籬陣陣飛花雨 樓燕銜香語 孤雲細草小溪晴 攀梅拾豆打流鶯  
短橋橫 楊花一似郎情薄 相見還飄泊 空餘三月斷腸春 萬重山  
外楚江濱 有行人



卷六

邑後學 陳去病輯錄

明

毛 瑩初名培徵字湛光一字休文晚號大休老人諸生有竹香

齋詞

去病案是卷所輯類皆明季遺賢與世家胤胄潔身高蹈

有故國故都之戚觀于毛氏更號大休略可觀矣前袁景

輅氏悉取入清詩徵似欠審慎故茲特

列之于明亦庶幾春秋表徵之旨云爾

念奴嬌 舟行

高情如舊但館娃殘夢不堪回首極目平湖三萬頃一片玻璃削就  
青雀舟輕白蘋風軟落日金波溜人家何處笛聲吹徹楊柳 看取  
遠樹晴嵐蕭疏幾筆寫出王維手攜得青州新從事不用重沽村酒  
盞面春深醉鄉天闊壘塊吾何有長年且住海鷗欲下知否

滿江紅 夏日

榴火燃紅又承露荷盤擎綠最喜是薰風徐拂午眠方足山色遠邀  
京兆畫湖光全現瀟湘幅看鴛鴦對舞白波翻珠千斛 柳影內人  
歸牧簾影內人初浴出龍團欲試中冷將熟重整冰弦彈水調新裁  
霧縠籠香玉忽松濤天半捲寒來肌先粟

浣溪沙 艷情

綺閣春深夜未央青衣十五髮初長博山爐煖慣司香 暗約芳心  
瞞小妹故拈閒語惱檀郎喚伊翻白背燈光

俞南史字無殊自號鹿牀山人諸生有鹿牀稿

望湘人 燕

怪溪梅瓣卸春社雨收柳汀沙岸飛徧試揀雕梁重營香壘銜到零  
紅幾片蝶舞將酣鶯喉漸老雙栖正暖卻翩然飛向深閨長與蕭娘  
爲伴 須把珠簾盡捲看分開翠尾往來如剪更對坐螺屏細認去

年人面西風幾日又催歸夢商略去程近遠爲我問秋雁來無萬一  
湘江逢見

顧樵字樵水自號若邪居士

千秋歲 壽王丹麓

花濃春晝纔過清明候新酒熟稱眉壽年華剛半百手植松篁茂風  
日暖綠陰院宇瑤琴奏家是烏衣舊繞砌芝蘭秀蒼水使書曾授  
身依雲谷隱名譽中原走誰得似西湖騷雅君推首

湯豹處初名孫振字雨七諸生

玉春樓

人在鬱金堂上住簾幙影交連理樹玉盆薇露淨如空寶鼎蘭烟濃  
似霧薄倖不來春欲暮情託子規聲裏訴個儂清減似梨花香雪  
一枝嬌帶露

鄒 樞字貫衡自號酒城漁叟有十美詞紀楊凌霄云偶于拾字

紙頁破碎而字跡尚未模糊且甚斌媚中載小序一小傳十傳後各綴以詞題其首曰酒城漁叟箸復有鄒樞字貫衡及松陵鄒氏家藏印章則鄒生者固吾邑人也其末一頁為琵琶婦朱增傳詞曰瀟湘夜雨已汗漫破壞不可復讀姑缺之

春風嬈娜 巧蝴蝶

借梁園金谷培養瓊肌珠作唾玉為啼道鬢堂女婢聰明侍鄭槐扉  
根葉窈窕名崔蝶譜時窺鳳毫輕點巧奪滕王孰與齊粉字吟梅和  
雪寫碧楸詠柳帶烟題 曾共湘簾吹絮倚簫選夢多少事說着眉  
低青嶂隔紺園迷缸花夜笑往恨重提鵲渚遺簪淚辭春閣鳳樓鎖  
珮影伴香溪鴻音憑紙待尋踪南浦橫塘待渡踏遍雲堤

內家嬌 如意

紗窗夢未醒簫聲斷遙憶玉嬋娟記美髮未齊嫩鴉初握步蓮堪印  
小鳳新鸞銷魂處流波傳細語低翠掠烟鬢薛氏校書芙蓉養紙崔

家錄事芝髓封編 草蕙蘭佳句相鳴和巧樣卵色魚牋誰是多才  
情種我見猶憐嘆輕鴻甫就銀屏生暖彩鸞旋去繡榻重寒多少愁  
霜悲火頭上心前

永遇樂 陳圓

濃點啼眉低梳墜髻聲驟平康苔翠氍毹花紅錦毯趁拍舞霓裳雙  
文遺譜風流誰解卿能巧遞溫涼香犀挽生綃淡束幾疑不是當場  
星回斗轉芳筵已散倦餘嬌憑牙牀玉版填詞瓊簫和曲粉脂尙  
磔紗窗鈿車催去燕臺程遠鼓鼙進譟漁陽風塵老蠻烟遠隔信音  
渺茫

綺羅香 卜賽

清剪冰華香團雪彩淡絕秋娘風度青粉牆頭門對白隄雲樹開曉  
幕茉莉來時臨涼檻木瓜馨處展鵝牋輕掃叢蘭白瓷斟茗篆烟午

堪憐江夢未杳曾草湘蕤麗句欣附芳譜擬結同心又值賦驪情  
苦空撇去萬卷霞綃覓西樓一塘春雨問何年重見風流小牕深夜  
語

解語花 沙才

相臺錄事韋曲司書仙藻憑纖手冷金牋剖兔毫嫩常伴翰林千首  
碧衫唾皺早看盡閭門楊柳賦小詞題徧鮫綃滿路飄香蕊 何意  
憐才贈玖寫迴文短幅春情先逗微波暗溜相憐處爲我客前辭酒  
傍奩未久又鼓棹石城渡口想到時懶唱桃根人似黃花瘦

惜餘春慢 梁昭

荳蔻衣香芙蓉笑譜小立春風門巷蜻蜓碧淺魚子紅深可體縠紋  
三兩戶外亂擁雕輪陪宴蘭臯繫舟湖上把瓊簫漫品錦箏微撥遏  
雲聲響 還自結願曲周郎哀絲豪竹心力盡消歌唱誰知燕燕不

信鶯鶯烈骨竟藏鴛帳思守藁砧又因金谷摧殘墜樓悲壯女丈夫  
櫬在吳門堪與要離同葬

拜星月慢 李蓮

鴛樹凝愁珠樓墮影慘慘啼紅幽夢扇冷桃花把香車誰控掩坊曲  
常自瓊梳懶掠粉碗梅鈿膠凍單離鸞語鵲此生休弄 憶芳筵曾  
受憐憐重扶衰體笑解春風鞚勉強撥阮搗箏苦霜飈吹送葬西施  
近在真娘塚簫聲斷零落歌紈鳳問誰念小玉情真賦招魂是宋

齊天樂 朱素

鮫宮一縷冰絲影亭亭幻成嬌倩梨夢方縈梅粧初洗迎入宜春歌  
院相逢未晚正茂苑新鶯白隄清管羯鼓催樽竹林頽玉笑稽阮  
雙紅豪思誰比酒壇臨未久離袂旋判南內雲痕西河雨蹟暗把吳  
綃偷染零箏斷扇念飲伴無多璧沉珠掩欲賦閒愁未吟先意懶

木蘭花慢 羅節

縱流溫傍玉評不到此真真看鳳曲鶯喉鳩驚燕舞態盡花茵步幄  
珊珊暗出似巫峰墜下一絲雲料想蜂狂蝶驟自應無處藏春 誰  
知歛恨與收欣却早乞閒身看仙杼梭霞芳屏畫草願事人情蘭棹  
五湖歸去迓慈幃猶念舊時恩鎖住花心柳性莫教飄蕩風塵

去病案徐鉉本事詩云吳姬舊有甲乙譜無錫錢星客復修之珠  
簾畫舫粉香載道一時諸名士各賦詩題贈名香奩社集詩愈無  
殊亦有沙才郎玄梁昭卞賽董曉蔣慶六首其詠沙才云晚寒強  
病出來遲微笑燈前影半欹祇為愁多長獨坐翻嫌情重易和思  
瓊花不是人閒種桃葉還從江上期若有好花兼好月攜來酒畔  
總相宜梁昭云日晚煙香護紫冥迢迢忽視下雲幘逢人每見敲  
棋局佞佛長思誦梵經醉裏歌聲憑扇煖座間眉色映人青酒闌  
黯黯消魂處明月臨空白滿汀卞賽云朝來曾不負芳辰晚坐花  
閒送月輪和曲自同王大令學書曾仿衛夫人每從南浦捐瑤珮  
長向西窗醉錦茵家在虎邱山畔住真嬈或恐是前身漁叟諸作  
疑亦類是而淒馨幽豔大有

吳鏘字聞璋一字玉川尚書洪五世孫諸生有復復堂集 袁景  
輅云



玉川爲人風流豪爽求友如不及工詩名播遠近凡名流至吳  
江必登復復堂堂前紫藤花百餘年物也虬根匝地綠陰滿架  
花時與諸同人飲酒賦詩其下配龐蕙纒性情  
詩品與玉川媲美江都宗元鼎作偕隱歌贈之

畫堂春

佳節姮娥不放閒只看燈影團圓更闌薄醉鞦韆雙鬢無限屏山  
妬煞一天風雨玉簫錦瑟生寒清光咫尺在雲間倚遍闌干

徐鉉詞苑叢談云壬子元宵吳荆西之紀沈龍門永令合樂玉樹  
堂名士勝流無不畢集花燈火樹稱爲極盛校書芳蓀雲間人色  
藝獨絕時微雨無月羣呼曰嫦娥何在耶吳玉川鏘笑曰咫尺雲  
問何云不見遂調畫堂春一闋云云席上有老樂工沈遂譜入管  
絃卽爲歌唱極歎而罷其詞傳播揚州宗定九元鼎刻之花鈿集中

鵲橋仙 冒巢民先生招同望江樓登高後復於望日作展重

陽會次韻奉酬

白衣送酒紅萸插鬢秋意最宜尋玩清歌一曲倚樓聽早不覺宮移  
羽換 良辰易遇勝游堪續新譜不妨頻按青霜未下素娥臨展佳

會剛逢月半

去病案先生晚歲悼亡恆客江上遂卒于雒皋冒巢民所計其初  
病至于歸概所費悉出巢民經紀備至故葉學山舒穎弔之曰魂  
魄休悲落異鄉故人高誼鎮難忘此生不  
向如皋死何處還逢冒辟疆誠實錄也

沈永啟字方思號旋輪有遜友齋集周廷諤云方思性穎敏詩文  
詞皆立就師事郡人金采采

以事誅累繫江寧獄他弟子皆避匿獨方思往詢候采被刑斂  
其遺骸復奉棺置所居吳家港家菴中人重其氣誼貌古樸喜  
禪理即之若惻幅者與之談詩文輒如懸河傾注不竭袁景  
輅云沈氏詩錄稱先生與一子二女皆工詞藻暇輒分題倡和  
子女有好句則回環歌咏以為樂子即成廈女即參苻纖阿也  
謝庭咏絮千古誇為韻事吾鄉前有午夢堂後有遜友齋嗚呼  
盛哉

虞美人 蓮涇阻雨

廉纖細雨蓮涇口何處沾尊酒天公也似太多情拚得柳昏花暝滯

人行年來浪跡真無謂歷盡愁滋味一燈蓬底聽模糊知道小樓

夢醒一般無丁紹儀云末二語暗用少陵今夜鄜州月

水龍吟 辛卯中秋僦居湖上憶舊

晚風驚散浮雲素娥玉宇開金鏡登樓王粲故園何處太湖千頃烏  
鵲南棲羈魂牢落室家萍梗歎潘絲欲染青山孤約忽醉裏愁重醒  
遙想楓江露冷已苔封故人花徑臨觴鬪酒裁詩浣筆當年稱勝  
烟鎖蘋溪漏催蛩砌夜寒相迸問今宵何事低徊撚帶茂陵成病

沈永禪字克將一字醒公號漁莊諸生有選夢亭詩聆缶詞周安

公風流縉藉儀度春容塵俗之談不露齒角紈袴之習屏滌殆  
盡其烏衣之俊流也少工舉子業有聲場屋以數奇不售遂淡  
於進取築室湖干嘯歌自尚以終 陳行之云漁莊所居在邑  
之南郊向稱柳堂別業中有綺雲齋翠娛堂藤花閣天績樓梅  
圃荷池小山諸勝即宏所中丞舊第也至今修廊曲檻猶映帶  
水雲竹樹間過之者想見往日林亭觴咏之盛輒徘徊不能去

南歌子

甲帳溫鑪鴨心香熨枕鴛春風只在玉窗前却是小桃枝上占芳年

剔燭頻宵起停鍼向午眠流鶯啼覺詞雅作養繡帷寒懊惱一牀

花夢又難圓

沈世潢字茂宏一字耕道諸生有釣梭集

周安云耕道風期雋雅日以琴書茗椀自娛年

四十後築室湖濱有飄然塵外之想袁景輅云耕道嗜好殊俗遇希見之書與法書名畫不惜重價購之又嗜茶客至折松

枝煮折足鐙相與品題賞鑑入其室者幾不知有塵世事也

減字木蘭花

秋夜夢爛溪別業

一枝曾寄七十二溪深處是秋夜迢迢重認當年舊板橋 西風瀟

漫月落烟迷秋夢斷覺後依稀只見蘆花滿釣磯

卷七

邑後學 陳去病輯錄

清

沈永令字聞人號一指順治戊子副貢生官高陵知縣有深柳堂

集嘔霞閣詞

錢濬云聞人自號一指因手有枝指也韶年穎悟應縣試時知縣熊魚山奇其文謂他日必以風雅

名世後果如其言詩詞書畫並入能品沈德潛云先生初知韓城縣時湯文正為潼關道以循良重之

離亭燕 龍門

誰把飛流橫瀉秦晉一絲分界翠壁鑿痕千仞立萬里銀濤天掛隔  
岸倚危樓掩映琳宮紅榭 幾朶雪花輕灑百尺冰橋高跨隴樹洮  
雲何處是惟有蓮峯太華遙望夕陽關片片輕帆東下

浣溪沙 閨思

約素腰肢削玉身花邊笑語酒邊嗔乍看歡靨乍看顰 竹葉萬竿

都是個雁行千隊只書人個人心事向誰真

酷相思

只隔疏櫺牕一紙各半空鴛鴦被聽秋雨芭蕉心滴碎伊覺也難成  
寐儂覺也難成寐一樣明朝衣上淚各自向心頭記暫借得行雲  
來夢裏儂夢也和伊會伊夢也和儂會

臨江仙

自別河梁成永訣十年夢繞遼西夢中牽袂數歸期刀環真浪約何  
日照雙棲 驀地歸來真是夢歸來日日分離不如依舊在天涯夢  
回鷄塞遠猶得到深閨

玉漏遲 除夕

不堪重記憶風塵碌碌浮生曾幾地北天南浪跡長驅萬里細雨青  
燈孤館更落日殘烟故壘遡不起秦關粵嶺楚山燕市 回首二十

年前轉眼舊游半生傀儡爲惜餘更不忍拋從夢裏爐火煨殘柏葉  
守不住流光如水拚醉倚遲明又隔年矣

董衡字順治甲午舉人

風中柳

綠水輕颿吹透黃金千縷怯微寒依依南浦殘煙霧歷玉笛和鶯語  
傍妝樓纖腰低舞長是消魂情盡橋邊人去繫蘭舟暗添紅雨三  
眠乍起見栖鴉無數慣飄搖露隄霜渚

吳兆騫字漢槎順治丁酉舉人有秋笳集

徐鉉本事詩漢槎騫才絕豔數奇淪落萬里投

荒驅車北上時嘗託名金陵女子王倩孃題詩驛壁以自寓哀  
怨云憶昔雕窗鎖玉人盤龍明鏡畫眉新如今流落關山道紅  
粉空嬌塞上春氈帳沈沈夜氣寒滿庭霜三月浸闌干明朝又向  
漁陽去白草黃雲馬上看情詞淒斷兩河三輔間多有和者故  
計改亭詩云最是倩孃題壁句吳郎絕塞不勝情其西曹雜詩  
自敘曰望慈幃于天際白髮雙悲憶少婦于樓頭紅顏獨倚婉  
轉悲涼如聽銀箏之嗚咽矣又云漢槎之徙塞外也書來言朝  
鮮使臣李節度雲龍以兵事至寧古屬製高麗王京賦遂草數

塞君韓力焚贖以還而館之愛重如逸海之得幼安與根矩也  
然何其壯也嗚呼公曰能文良朋愛友太憐才真一時佳話  
是吸而盡太傅笑曰余直戲耳即不飲余豈不救漢槎耶雖  
也金蘭倘使客手巨觥謂終當飲滿為救漢槎華素不飲至  
云聞之竟為道地而漢槎生入玉門矣願生名永者詠其事  
中我當以身任之華峯曰人壽幾何公乃以十載為期耶太  
曰河梁生別之詩山陽死友之傳得此而三子成容若見之泣  
把空名料理傳身後言不盡觀頌首太傅之成容若見之泣  
今須少作留取心魂相守但願得河清人壽歸日急翻行戍橐  
為君剖兄生辛未吾丁丑共些時冰霜摧折早衰蒲柳詞賦從  
不減夜郎僂儂薄命長辭知己別問人生到此淒涼否千萬恨  
年來深恩負盡死生師友宿昔齊名非忝竊試看杜陵消瘦曾  
胥承一似紅顏多薄命更不如今還有只絕塞苦寒難受廿載  
殼比似紅顏多薄命更不如今還有只絕塞苦寒難受廿載包  
手冰與雪周旋久淚痕莫滴牛衣透數天涯依然骨肉幾家能  
貧子幼記不起前杯酒魍魅搏人應見慣料輸他覆雨翻雲  
平安否便歸來生華峯館於蘭太傅家寄吳縷曲云季子  
古塔其友顧貞觀袁枚隨園詩話康熙初吳漢槎兆鵠家兄妹  
好倘復惜班揚賦夜郎王淚盡臨關月心吳漢槎兆鵠家兄妹  
聲名箕子國詞賦夜郎王淚盡臨關月心吳漢槎兆鵠家兄妹  
如故無錫顧貞觀梁汾寄漢槎詩曰萬里自誰能憶三都只自傷  
千言以應其國頗以漢槎詩為重又自云彷彿班揚其狂態



念奴嬌 家信至有感

牧羝沙磧待風鬢喚作雨工行雨不是垂虹亭子上休盼綠楊烟縷

白葦燒殘黃榆吹落也算相思樹空題裂帛迢迢南北無據 消受

水驛山程燈昏被冷夢裏偏靈芬館詩話叨絮兒女心腸英雄淚抵

死偏縈離緒錦字闈中瓊枝海角詩話辛苦隨窮戍柴車冰雪七香

金犢何處譚獻云其氣不怯宜乎生還

采香子 寄文柔妹

縞綦義烈人誰似淡月寒梅寂掩羅幃生受黃昏盼紫臺 遙知楓

落吳江久白雁飛回錦字難裁一片紅冰熨不開

四明萬斯同曰吳兆騫吳人康熙某年流寧古塔後釋歸其守將安珠護謂之曰乙酉破楊州吾在軍親見史閣部死初城破求史公不得久之乃自出衆挾之見豫王王疑其偽史公曰我出明白死豈偽耶王令人識之果然勸之降不應乃殺之吾生平第聞忠臣不知何狀及見史公乃知世真有忠臣但漢人不知或誣以爲遜去今聞朝廷修明史而徐立齋先生領史事子歸幸以吾言告

之

葉 燮原名世倌字星期又字已畦號橫山明虞部紹袁第六子

康熙庚戌進士嘉善籍官寶應知縣有已畦集袁景輅云先生之

落職時嘉定令陸清獻公亦被參劾先生曰吾與廉吏同列白

簡榮於遷除矣既歸移家入橫山築小圃顏曰獨立蒼茫處著

述其中商邱宋中丞聞其名滅從往訪辭不見宋公曰獨立蒼

茫處容一立否留二絕句而去先生不往報也晚年寓蕭寺有

富豪家招之飲先生曰吾忍飢誦經豈不知居沽兒有酒食耶

其性剛直至老如此又曰先生風流宏獎所交皆當世人宗

丙寅九日大會于二棄草堂冠帶之集幾徧江浙同用昌黎贈

張祕書與人日城南登高韻賦詩紀事所刻用九集見者以不

得與會為恨  
遐方怨 閨情  
妝未了日高升菱花眉暈小蘭葉鬢雲橫簾通燒篆曉痕平寶釵斜  
膩墜無聲 春漸老帶圍輕簷鵲頻偷報應知鬥草羸晝長無事理  
銀箏困人疏雨小池亭

浣溪沙 秋林晚眺

簾捲回廊挂玉弓  
草根切切響吟蟲  
前林黃葉起西風  
橘刺牽衣

花架礙菱絲  
織水畫橋通  
釣魚船尾小  
鐙紅

葉舒穎 一作穎 字學山明虞部紹袁姪孫順治丁酉副貢生有葉學

山詩集十卷 周銘云學山風情月魄不讓古人其詞如春鶯初

氏自虞部與配宛君以詩名家一傳而雲期星期再傳而元禮

學山門才之盛幾為一邑冠學山性洒脫終日咿唔不事生產

中年後家漸落淡如也去病案先生少孤賴母夫如所親故

成立生平篤於倫紀母亡孺慕不衰視從兄姊伯叔如所親故

世與橫山元禮並稱不知其非嫡也其配沈素嘉故從姑蘇綢

女於先生為中表琴瑟尤叶中年悼亡竟不復娶嘗有夜歸句

云那得歸來不斷魂蕭然四壁一燈昏牽衣稚子叨叨說今日

不再傳遲絕其所著述大半飄墜嘉慶朝平望殷東溪得其詩  
于里中程氏而葉之宗人名肇陽者復丐得之其兄耕雲年六  
十六矣兩日幾耗竟力任鈔寫遂得十卷藏諸家于是先生之  
詩世上始有二本而其文詞卒弗獲也厥後又閱九十七年之  
至宣統紀元已酉正月人日余自東江擢舟過盧區起居陸丈  
鷗安承以其稿見畀云即得之葉氏者噫一先生集也亦何顯

晦之不可測耶致先生之生係有明崇禎四年辛未正月人日而余得此集亦在正月人日然則先生今而後庶幾可不朽歟  
百字令 題朱太史竹垞圖

修篁夾徑似依然留賸平泉花石人在天光雲影裏占住樓高百尺  
叉手吟成等身書擁嘯傲煙波夕閒時載酒江湖曾作浮客 回憶  
翦燭寒宵菜根題扁邂逅文章伯爭艷探花遊上苑又早歸來岸幘  
曲水拖藍遙山疊翠渺渺神仙宅可容舴艋長蘆深處尋覓

洞庭春色 題徐虹亭楓江漁父圖

早脫朝衫東隨烟霧恰到鱸鄉有鷗鳥知心肯來翔舞鯛魚不餌誰  
換豚鮐悠然下釣收綸處把渭水嚴灘付兩忘堪流賞是碧連春渚  
丹映秋江 偶對漁樵伴侶懶回頭細話行藏任風雨唱歌簑衣翁  
笠津亭打鼓錦纜牙樯只留世外清銜在勝帶著笭簖喚漫郎還尋  
取似濠梁游興重注蒙莊

徐一詞苑叢談余舊屬謝彬畫楓江漁父圖南海屈大均題云夢  
裏一峯青依稀西洞庭平生愛林屋未得隱秋屏白鷺自高下梅  
花相杳冥君家在何處招手且虹亭蓋余號虹亭故云新城王阮  
亭先生云十載吳江狎釣絲筆牀茶具似天隨朝來宣賜蓬池鱸  
却憶鱸鄉亭畔時施恩山云秋雲漠漠水漫漫一色芙蓉十里寬  
不向長安飢索米那知回首憶漁竿彭羨門云手結夫須上釣舟  
霜黃初落潦初收憑誰翦取吳江水併作楓林一派愁嚴蓀友云  
瑟瑟波中一櫂迴鳩雛相趁小驚猜等閒莫道持竿手消得珊瑚  
架筆來關中李劬菴云休沐歸來把芰荷絲綸聊復試清波得魚  
換酒憑酣臥不畏花磚日影過虞山歸孝儀云家住吳江笠澤邊  
短簑細雨綠楊煙從今預擬閒來往看到溪山二十年益都馮相  
國云楓江一棹五湖灣秋月蘆花亦等閒誰使金門飢索米更牽  
魂夢到吳山皆能極道江湖之樂長白成容若為余作漁父詞云  
收却綸竿落照紅秋風寧為翦芙蓉人淡淡水濛濛吹入蘆花短  
笛中同人以為可與張志和並傳浦濱葉蒼巖映榴因為余題一  
絕於後云身隨鷗鷺狎煙波十里南湖一棹過月下樵青携斗酒  
飲酣吹笛撰漁歌以志和  
善擊鼓吹笛嘗撰漁歌也

葉舒崇字元禮號宗山明虞部紹袁長孫康熙丙辰進士  
籍平湖官

中書舍人有宗山集謝齋詞  
舒崇雖房序屬四實長孫也字之

寶掌昔魏晉間有寶掌和尚住世一千七十二年取其壽也自  
慶有孫又悲世俗無子哀悼何能遣歟因名世俗女曰寶珠法

華經八歲龍女獻寶珠于文殊菩薩化爲男子今年歲在龍世俗身後止此一女是代爲男也合之則又掌珠之意焉宋琬云乙酉夏余避兵吳江葉仲韶先生家乳者抱三歲兒出先生授余抱置膝上卽今文孫元禮也別十有六年元禮年弱冠已掉鞅詞壇望而知爲謝家玉樹矣徐鉉云元禮爲仲韶先生孫與星期進士並擅文譽有大小阮之目早歲飄零倦游京洛嘗與僕輩痛飲燕市有青山埋骨黃爐邈紅豆關心綠鬢殘之句朱彝尊云吳江葉元禮美丰姿少日隨其兄學山過流虹橋有女子在樓上見而慕之問其母曰有與葉九秀才偕行者何人也母漫應之曰三郎也女積思成疾將終語母曰得三郎一見死無恨矣氣方絕元禮適過其門母以女臨終之言告元禮入哭女目始瞑予爲作高陽臺記之一時交傳其事後至會稽每入市窺簾者夾道時宋副使琬觀察越中曰是將看殺衛玠因招之入署讀書及歸余送以詩云明童倚曲動梁塵姪女新妝更絕倫齊向羊車看衛玠臨行愁殺洛陽人王士禎古夫于亭雜錄葉元禮神清不減衛叔寶己未鴻詞之舉閣中諸老亟薦之至京病卒去病案元禮爲漁洋門下士故集中有詩云阮家未臥酒鑪旁荀令橋南惹恨長鴛鴦脰湖邊逐春水化爲七十二鴛鴦蓋卽指流虹橋事也惟序稱平望酒家女非也

浣溪沙

孤山別墅有感

徐鉉詞苑叢談云葉元禮舒崇客西

時尙未破瓜也雲兒居孤山別墅密簡相邀訂終身焉別五年復至湖頭則如彩雲飛散不可踪跡矣元禮撫今追昔情不自

禁援筆賦浣  
溪沙四閔云

彷彿清溪似若耶底須惆悵怨天涯青驄繫處是儂家  
生小畫眉

分細繭近來綰髻學靈蛇妝成不耐合歡花

柳暖花寒懊惱時春情脈脈倩誰知廉纖香雨正如絲  
團就鏡臺

烏鰂墨寄來江上鯉魚詞此生有分是相思

潛背紅牕解珮遲銷魂爾許月明時羅裙消息落花知  
蝶粉蜂黃

拚付與淺顰深笑總難知教人何處懺情癡

斗帳脂香夜半侵幾番絮語夢難尋清波一樣淚痕深  
南浦鶯花

新別恨西陵松柏舊同心一番生受到而今  
去病案本事詩載元禮寄阿芸一律云記得華

堂始目成珮環疑逐步虛聲筵前鳳曲紅牙按月底龍團素手烹啼  
罷鵲魂傷錦瑟夢回蝶影鬧春城何時雙槩三生石繡佛幢前再證  
盟虹亭云杭州人想即雲兒也

望遠行 春暮燕城偶作

平原綿邈紅霞抹惆悵春光纔暮幾番花謝一陣風狂做就隋宮綠  
樹無限興亡贏得竹西三月鼓吹年年如許最傷又值江天梅雨  
相語只有斜陽一片也曾見錦帆無數螺黛香消瓊簫夢斷行雨蕭  
娘何處試看蒼苔沒井白楊滿地怕讀鮑昭遺賦聽杜宇聲聲勸人  
歸去

玲瓏四犯

用延露詞舊韻

楊復吉夢闌瑣筆云元禮年少美  
姿容當世有叔寶安仁之日嘗游

西子湖夢與湖山神遇歸  
而不能絕作詞以自警云

斗室香殘聽漏永銅壺人聲漸少欹枕朦朧身已在華胥道  
鷺見天姿勝雪倩一片巫雲吹到問神女生涯何處可要韋郎同廟  
繡幃斜倚湘裙展就人恣意回身抱翻懊惱兩情乍洽忽透靈犀  
竅黑甜豈是溫柔偏此際纏絲還要賴簷前鐵馬叮嚙好把癡魂  
驚覺枕豈游仙却夜夜藍橋合驩不少絮語殷勤未怕人兒知道  
怪殺往



還無跡如有約五更便到指牆內紫荆一樹彷彿盤塘神廟 可憐  
並體紗窗下剛半晌珠偎玉抱一樣有月明如水照破相思竅盡說  
沈郎腰瘦觸手處那禁不要任多情同夢相甘暗損年華誰覺

俞 瑒字犀月

東風第一枝

借友游峽山次宋人韻

去病案峽山又名硤石  
同時周青士汪季青並

有此詞意亦略同疑  
卽犀月所借游者

柔櫓衝煙晴波生縠輕風一路催煖曉容隱約雙鬢指點兩山黛淺  
平蕪渺渺也都似錦茵鋪軟問踏青女伴誰家半鞦韆邊飛燕 逢  
勝侶暫舒青眼更緩步輕携便面夾紗衫子新裁曾記杏花池苑春  
光穠冶偏繫徧垂楊如線向酒闌檢點閒情早悔陌頭初見

邱 乘字御六有叙秋詞

點絳脣

春約愁來年年愁得人如此愁還有幾春又將歸矣  
說是春歸愁更纏綿起何時已春頭春尾沒箇無愁地

卷八

邑後學 陳去病輯錄

清

鈕琇 原名泌 字書城一字玉樵康熙壬子拔貢生官高明知縣有

臨野堂集 沈德潛云玉樵博雅多聞著瓠贖一書能舉見聞異詞者折衷之可以補正史之缺詩亦變風之遺 陳

行之云先生歷任邑宰所至有善政於項城則安集逋逃于沈邱則昭雪沈獄于蒲城高明則鋤強暴嚴守禦民賴以康卒于

官旅櫬蕭然越數年乃得歸葬嗚呼先生固博物君子也其亦古之遺愛歟 袁景輅云明府考芥庵老叟家貧好客喜吟咏

庭有海棠一枝花時與嚴溪吳沈諸子觴咏其下有句云詩憑鄭谷題初雨飲待徐佺醉曉風至今猶傳人口

踏莎行 燕

翦翦東風蕭蕭社雨一生何事長羈旅畫梁繡幕屬他人寄人廡下  
終當去 柳絮池塘梨花院宇春光半爲營巢誤舊時王謝已無家  
重來不視營巢處

御街行 駕湖元夜

樓臺如夢夜如年涼露瀉銀蟾春宵未許千金換况有涼月初圓幾  
通畫鼓數聲響爆攪破五更寒 酒亭花市語聲喧風裊絳紗烟笙  
歌簇處星毬滿都在曲院勾欄綠窻半掩紅妝爭倚多少玉人看

一萼紅 燈花

伴寒闈正清輝的爍丹蕊發盈枝鳳翅分烟蘭心吐穗徐看刻玉痕  
移拚孤坐三更漏斷有人在紅閣夜敲碁隔雨簾疎護風屏小金粟  
垂垂 惹起舊愁無限想羅襦背解喜報芳蕤癡卜佳期誤占遠信  
孤負多少想思憐碎影依稀似語那堪向珠淚欲銷時好把香煤剪  
取待畫雙眉

夢橫塘 蝶塚

雲塘粘粉月檻棲香花間曾記幽遇金縷飄零誰喚起春來嬌舞相

逐釵頭乍迷裙底風流何處嘆紅牙按譜遺拍猶存麝蕪冷惟抔土  
素紈閒撲牆陰早織魂一片驚斷遊女化玉初成空剩得舊叢如  
許好收瘞滕王畫卷謝子詩囊並千古栩栩燈前翩然入夢有西園  
芳路

水龍吟 白蓮

蟾宮素女三千誰教舞向瑤池裏卷綃霧薄弄珠烟細原名花藥蓼  
襯微紅葭圍斷碧亭亭出水想西陵畫舸輕移雙槳難覓却鷗眠處  
聞道生來玉井乍相逢銀塘十里最憐傾蓋不須污粉清寒如許  
廬嶽禪心樊川賦筆幾回延佇怪月明但有香來終夜闌千重倚

摸魚子 蓴

過桃花水痕初漲吳天遙寫晴鏡生如釵股浮青出鳧葉羃波常淨  
烟路迴更荇帶荷錢接疊還相映香寒色瑩喜犀筋凝脂磁甌泛玉

鹽豉點偏勝 紅塵事莫教秋來未醒當時鱸美誰並歸心一夕愁  
波起貯得幾絲清冷應猛省是到處西風堪動扁舟興鷗飛鷺冥想  
千里茫茫高人獨去翠剪半江影

齊天樂 蟬

微薰天氣濃於酒萬綠陰陰催晚槐日閒庭柳眉深巷幾樹夕陽聲  
滿炎情不染正潔飲常清高吟自遠贏得佳人薄勻雙鬢鏡中撚  
秋殘猶集古寺乍聞涼雨後不勝淒斷弔月蛩悲啼烟螢急曾是小  
窻幽伴孤眠客倦記珥重朝冠綃輕宮扇舊夢難尋暮雲迷翠館

慶清朝 贈陳內翰其年

瘦擁詩肩狂添酒胆絕倫誰得如髯畫溪歲月寄情多在香奩宛轉  
麗詞爭唱錦靴暗點雪兒尖何須如庾郎哀艷僅賦江南 一鶴飛  
書入隴看幾年珠淚消盡青衫雲烟落紙驚聞遙啓宮簾應有賜袍

初繡夢中花管色相兼休吟道舊山悔別微祿羞沾

瓊花慢 贈朱內翰竹垞

花撥垂鞭蒯緱携劍是舊時遊跡齊宮燕市記淋漓醉墨尙留紅壁  
逢迎若箇笑袞袞少年裙屐但賦成換取黃金付酒旗歌席 偶然  
天子呼來便芍藥欄前起弄吟筆玉堂月俸堪貰酒鈔給烏翎三百  
宦塵如海曾不點山人衣白好夢在一枕松風仍繞故園泉石

驀山溪

冷光無際晚失行人路茅屋隱平田望遙村但留疎樹饑鳥似墨幾  
點散驚風荒渚外小橋橫孤廟僧扃戶 吟髭生凍撚短難成句馬  
首獨衝寒正深入亂雲低處枯聲颭荻彷彿是河干依斷岸有漁舟  
紅閃篷燈露

瑤花 河冰

長河載雪一夕西風把紋波吹結酒簾漁網家家岸零亂橫釵垂玦  
棲鴻難定但幾處汀蘆黃折想神妃步襪無塵閑住水晶宮闕小  
窗靜鎖梅魂看瓶凍琉璃誰並芳潔故園何在奈此際正阻夜溪歸  
櫂清寒相照算只有天涯孤月問當時一片心期人在洛陽能說

漁家傲 題大梁旅舍

一點秋來鴻背羽柳外輕雷碾出絲絲雨草色到城朱閣吐天欲暮  
行人衣染行塵古 屈指遊梁今已五醺酒罇頭酒伴誰高杜如笠  
小軒容獨步青滿戶數竿修竹牆隅補

柳梢青 宛丘登蘇氏園樓眺望

紅墜蓮秋孤城一片晴抱芳洲蘇老文章鄭家賓客往事雲浮小  
山新結飛樓沙渚外堪橫遠眸泛不嫌風眠能戀月只有閒鷗

疎影 秋柳



青疎隴首乍淒風幾陣吹到涼驟無力勝綿有恨垂絲困倚夕陽衰  
埃曾經栗里門前路正相近菊開時候豈長條似昔依依尙忍向人  
分手 猶憶隋隄繫舸伴蘆花月影搖曳江口怕聽啼鳥懶試遊驄  
但有酒帘依舊畫樓十二渾如夢映是處翠簾紅牖空歎伊金縷飄  
零剩得舞腰俱瘦

百字令 過周邸遺址

殘山剩水有周遺古壁紅顏秋晚僧老未忘金粉地占作祇林亭館  
千騎霓旌八公丹竈往事桐曾剪鐘聲花午似傳宮漏餘點 聞道  
壤竊黃巾濁河驚走城不留三版雉堞已非當日舊何況尋常巢燕  
賓硯珠沈姬符錦碎誰識王孫苑蕭蕭池柳弄風疎影零亂

滿江紅 旅庭紅蓼

秋老孤庭還又把秋光留綴苔階下莖搖鶴膝細紅我穗點點好風

扶不定紛紛纖月看如墜最憐伊霜冷欲飛時容偏媚  
宜曉鏡湘鬢對宜晚渚睢毫續是誰移種此落英籬背蘆葉三更鴻影斷蘋花  
兩岸蛩音碎想疎枝斜拂釣船頭漁翁醉

瀟瀟雨

秋晚羣山出見涼颿捲樹帶愁吹漸埋黃壓碧亂痕都散碎影相隨  
回首濃陰池閣惟倚醉霜枝似我飄零客一樣淒其誰道宮溝易  
鎖把芳心流去上有題詩想催情綬色舊景繡牕時而今冷蛩聲外  
但孤燈村遠逗疎籬蕭蕭夜掃圍茶竈佇吐烟絲

疎影 初夏閨倦

林花無賴將紛紛瘦影飄送簾外朱了櫻唇黃了梅心誰家尙有春  
在柔風當午催人懶縮不起縷金衣帶晝憎騰新夢來尋忘却綠鬢  
雲壞一鏡遙山未鎖任萱留霽色奪取眉黛卸甲冰絃斂子文楸

凡事都非心耐幾回獨往閒庭宇悵此日碧天如海聽雕梁學語呢喃知是燕雛兒大

五綵結同心 鴛鴦

共池頻顧分島爭飛靜占銀塘新水春澱明於鏡閒數到七十成行都紫最憐是處雙棲穩鎮長並藕花香底俯江檻誰拋蓮子忽把夢兒驚起 有時雨翻珠細却暗藏曲渚翠偎紅倚人在重簾下遙生妒一點相思輸與芳名顛倒將伊寫封兩字綠窗小几更語針娘繡他交頸須繡到白頭爲侶

好事近 秋夜舟行

十幅峭蒲帆卸下柳西新月隔岸螢光紅小與林燈明滅 客心淒斷在孤舟好似初零葉臥聽無邊蟲語把秋聲生咽

南歌子 重過大梁旅舍

簾水雙鈎揭屏山六扇圍舊痕苔逕未全非尙有似人黃菊淡相依  
愁攪吟思亂寒衝醉力微不堪雨色傍簷飛終日沈沈如夢送秋  
歸

鵲橋仙 七夕

瑤鈎墜影銀河息浪鵲報雙星渡了天家原不勝人間也只是離多  
會少 犢禪收曝龍梭停織秋到蕭齋偏早此生巧處盡成愁且莫  
願年年賜巧

惜秋華 晚眺

平野烟凝見牧歸兩兩隴頭人少雉堞粉痕遙映殘霞飄渺寒鴉幾  
點孤村外爭帶夕陽紅小又何處疎鐘漸起松關聲杳 遠近山如  
抱但無邊亂碧影隨峯倒乍變一天暝色素空雲掃微涼陡入西樓  
纖月向林端來早秋老愛初蟾冷垂銀好

翠樓吟 春雪

風信頻催雲陰忽定密雪霏霏飄墜萬家春樹冷早迷了灞橋歸騎  
高樓誰倚但曲檻留紅重帷藏翠人姝麗玉鑪香燼畫簾垂地 好  
餘鬪草工夫將瓊獅爭塑綵鈴雙繫晚來携燭照怕明日簷前朝霽  
輕沾斜綴任柳誤清眠杏銷殘醉門深閉問伊閒鶴今年寒未

永遇樂 祝家易庵夫子八十

菡萏門深篋管蹊永爲小園地正則庚寅義熙甲子絕異人間世恍  
然回首江山故國幾見隙光奔驥向疎牕烏絲翠管夢華遺事曾記  
北林枕月南田巾雨未忍一竿辭渭點檢詩城平章麴部薄試閒  
經濟瘦筇相引何朝可杖只合倚吟扶醉儘從容文楸坐隱橘中客  
至

青玉案

徐內翰虹亭以所輯詞苑叢談見惠賦此志謝

蓬山夢斷蘋州雨歸去作鷓夷子拂黛研朱漁笛裏玉堂嘉話玉臺  
新詠多少銷魂事 金花當日曾宣賜早向華牋染佳句試問而今  
流播處三都傳寫九江分餉狼籍雲藍紙

賀新涼 中秋送鄭子源還醉里

小閣青山夜正中秋雲破遙天彩蟾光射芳桂飄花紛似粟燕子商  
量辭社問佳景向誰再借千里湖邊蕙夢斷染羈愁素髮絲盈把綃  
衣冷露珠瀉 鷓鴣詞客來吳下喜他鄉開尊相對碧柑紅鮮明日  
扁舟離海國南浦高帆已挂還憶我楓江魚舍舊徑菊松無恙否羨  
君歸我亦謀歸也淵明賦手重寫

菩薩蠻 題香笑亭

溼雲如夢愁難醒曉來雙燕棲梁冷最忍是東風吹殘杏靨紅 玲  
瓏花影照亭小名香笑點地繡成衣看他春自歸

踏莎行 百花菴送春

芳草萋萋盈隄徧野天涯不繫王孫馬柳垂無奈別離何花飛還似  
飄零者 鳩婦成家燕兒知社萍踪堪寄惟蘭若三分春送酒杯中  
十年恨集寒燈下

月華清 蟋蟀

苔繡泥封藤鈎石罅是伊俟秋吟處靜耳聽來多在綠階青渡桐一  
葉曾記唐風燈四壁初成歐賦如訴但牀下相親清宵難曙 見設  
閒堂紅粉列小隊金盆鬥旗頻樹弔月當空尙有莎閒纖羽驚忽到  
倚杼深閨悲不了臥麟荒墓盈路任愁人多少淚沾遙戍

燕山亭 野人有餉李者用句曲外史詠楊梅調

廉井留甘仙蹊孕脆董杏張梨堪亞古越荒郊幾樹斜陽曾入樵人  
閒話占得住名每摘向綠陰朱夏盈把看冰盃初沈西園清夜 葉

心時墜風前疑暗落金丸覓流鶯打采筆素箋醉草疎牕好與來禽  
同寫雲壑相貽又何用勞人重馬問甚處再覓伯陽舊舍

東風第一枝 觀韓孟一庭前海棠

風剪裁脂露珠綴碧重簾豔影初逗乍聞閨苑飛仙喚作畫堂名友  
翩然舞醉好似酌紫霞天酒問輕盈若箇能扶付與一雙紅袖 冷  
曲徑溶梨月瘦迷古渡暈桃烟繡笑他蠹俗漫山得入黃州夢否蒼  
鬢素靨算只有芳梅堪偶待明年春滿朱門報我禁烟時候

畫錦堂 慕公子寓齋

碧甃飛鴛銅觚駐爵重門靜掩清晝浪影搖花是處風簾垂繡紗幙  
綠將筠黛借彫闌紅與榴衣鬥秋生後蟬雨送涼疎林夕陽微逗  
書圍髹几上有蓉粉藏箋薇香凝籀沈醉文仙不在舞裙歌袖占角  
戲爭燈下羿射鬪密發尊前覆新詞就笑看濡毫寶硯小童擎候



綺羅香 螢

墜地仍流飄苔忽定生小暗明相半巧弄輝輝添繞碧梧闌畔攜錦  
字映出疎囊趁玉砌撲來輕扇更臨波菰蔣成叢烟邨破屋夜深見  
當年應有遺恨化荒原腐草古今頻換留得餘光長是雨沈風散  
秋欲老駝陌悲涼客未歸鹿場零亂問幾點珠斛曾量冷飛舊隋苑

秋霽 柿

吟葉催肥擁一帶斜陽蔽盡秋屋烝棗烟疎摘棉雲小滿林硬黃初  
足晚陰臥犢暗巢未許來禽宿待照眼如火月明涼舸載千斛 須  
知蟹禁好擘寒膏笑聞蘭閨紅漬纖玉更炎窗輕霜落杵雙環小印  
成銀麴滿盃冰泉消暑酷看佇愁處依樣繡作詩囊蒂聯絲軟瓢分  
綃蹙

沈

雄字偶僧諸生著有柳塘詞古今詞話柳塘詞話

周銘云偶  
僧覃思著

述所輯詩餘箋體足爲詞學指南其自著綺語亦超邁不羣  
袁景輅云偶僧從虞山錢牧齋遊詩詞俱有宗法所輯詞話分  
詞話詞品詞辨三門簡而該  
約而精曹秋嶽侍郎盛稱之

浣溪沙 梨花

壓帽花開香雪痕一林輕素隔重門拋殘歌舞種愁根 遙夜微茫

凝月影

凝蔣詞  
選作疑

渾身清淺剩梅魂溶溶院落共黃昏

前調

靜掩梨花深院門養成閒恨費重昏今宵又整昨宵魂 理夢天涯  
憑角枕卸頭時候覆深樽正添香處憶溫存

如夢令

黯淡孤燈絮語淒切寒螿愁緒伴我不曾眠同在桂堂深處羈旅羈  
旅聽足五更秋雨

一痕沙 對鏡

道是蟾光又近道是波光又定眉語總相瞞笑啼難  
休羨孤燈影  
悄生怕雙蛾春老悞我一生看膽兒寒

前調 撫枕

繡被和伊作伴玉腕替伊扶倦今夜夢魂賒故欵斜  
好景黃虛閱  
徧私語黃鷄催斷猶自占啼痕且溫存

浣溪沙 午日

畫鷁齊驅水面鳧玉人相傍在冰壺額黃宜稱入時無  
杲日亭亭  
遮蝶扇薰風面面顛釵符醉伊纖手碎菖蒲

遠注橫波看擲鳧葵榴裝滿水晶壺綠窗女伴喚來無  
繭白新纈  
雙臂縷麥黃重擘小釵符水嬉閒處鬥檣蒲

前調 五更

嬾是矜持恨是嬌殘缸細炙倩誰挑好償磨折度長宵  
殘夢斷來

渾未斷輕魂銷盡苦重銷剩將小暗足春朝

減字木蘭花 憶夢

夜遙燄短行盡江南鶯不管睡熟屏開蕊地風情月也猜 分身恰  
恰影是楊花魂是蝶別緒綿綿樓上春雲水底天

虞美人

紅襠亂卸嬌無主半晌行雲住眼期心諾被伊猜何待花陰月午約  
重來 橫波曲徑金釵溜頓欲和羞走偶擡素腕挽濃雲又罵春風  
吹動石榴裙

南樓令 懷張耕烟進士南游

遠岫冠輕霞高城起暮笳亂楸枰一角飛斜懊恨年時殘局換拋餘  
子落天涯 北海儼浮槎南雲望建牙送春風燕入誰家杏館蘭舟  
留不住差辛苦費韶華

滿江紅 斜陽

渡頭烟浪遮不斷西崦殘日爭半壁江天張錦翻騰殊色天路歸雲  
紅欲暝山家晚炊青還直看欹斜人影隔溪家支筇立 流水外鳴  
蟬急落葉後昏鴉集便低徊返景一時蕭瑟銷盡斷紅林火沸催教  
片雨江楓出口吳王故壘落霞邊添悽惻

金明池 秣陵懷古

山上圍棋渡頭麾扇那怯寒潮夜雨重借問繁華六代又荒堞斷碑  
如許願官家世世生來莫應似衰草斜陽垂暮歎幕府頻移鑿輿潛  
幸一任晚風吹去 江左夷吾在何處便星散雲馳此身無主問滿  
日虎旅鴛行還講得舊時門戶最傷心烟柳臺城儘巷口烏衣興亡  
難訴但萬里長江未銷離恨一派濤聲猶怒

周 銘字勒山著有華胥

一作香

詞林下詞選松陵絕妙詞

顧有孝云勒山

所著華香詞甲乙集似取裁於遺山放翁之間者余雖不知詞  
讀其詞可以知其人矣袁景輅云勒山工詩尤善填詞所輯  
林下詞光豔可並玉臺松陵絕妙詞前輩之長篇短調有美悉  
登生平踪跡幾半天下常往來于日本諸國有句云乘楂每弄  
扶桑日躍馬曾攀秦岱雲又在日本時撰竹枝詞數十首其國  
即播之管絃惜其詞不傳此與朝鮮使臣購徐虹亭菊莊詞可  
並為藝林佳話

風流子

寄憶

篝燈扶夢去沈沈雨路阻舊紅樓憶雞舌烟中蝶迷綠綺蝦鬚影裏  
人倦篋篋誰能負情黏翡翠帳魂繫木蘭舟玉頰粉銷愁潮易湧星  
眸淚溢恨雨難收無端成遠別怎禁得相思動便三秋欲寄雲中  
錦字怕疊離愁悵鳳鸞深誓尙羈眼下鴛鴦小牒時掛心頭合辨低  
情軟性來殉溫柔原註隋文帝為蔡華作瀟湘綠綺牕

虞美人

春風入鬢眉添暈怯膽瞋人問頻呼底事不回頭不信幾番見後尙

含羞 防他鸚鵡搖纖手粉面丟人走消魂此際在秋波試想倘然  
真箇更如何

徐鉉本事詩吳權小鳳曲爲勒山賦迎來雙槳蕩春潮細雨東風  
送小喬淚裏紅綃還阿母爲儂寄到鳳皇橋踏青仍與小姑偕故  
故回頭碧玉致幾日春陰花落盡香泥先沁鳳頭鞋休唱南朝本  
事詩鳳箏錦瑟出簾遲曲成不用周郎顧自寫烏絲付雪兒比翼  
休同凡鳥猜梧桐滿院半新栽風  
鵝詎得供臬食定爲人閒療妬來

吳 權字超士一字習隱明大司寇洪六世孫貢生秀水有觀成

堂稿

沁園春 馬

紫燕翻雲白鵲嘶春天馬再來甚犇霄躡電頻周日舍晨晷銅雀盡  
出龍媒宛種朝馳房精夜降腰裏騰驤櫪上材誰能顧便千金價重  
歛起風雷 羣空牝牡休猜爭得似風流買駿臺更王郎耽癖薔薇  
作供劉家尙武苜蓿新栽駿入僧憐嬌將妾換對舞登牀進酒盃長

鳴久看流珠歎玉千里初回

沈丹楸字鳳岐

浣溪沙 東家瘦吟

買賦何人問馬卿可憐消渴少金莖輸他瓦釜似雷鳴  
眼底秋風  
雙鬢白屋梁落月一燈青牛衣相對不勝情



卷九

邑後學 陳去病輯錄

清

徐 鈞字電發一字虹亭自號楓江漁父康熙己未博學鴻詞官

翰林院檢討有菊莊詞楓江漁父詞 定例每年寧古塔人應往

朝鮮國會寧地方交易一次本朝照例差六品通事一員赴會

寧地方監看交易康熙十七年吳孝廉兆騫因丁酉科場事久

成寧古塔將菊莊詞及成容若側帽詞顧梁汾彈指詞三本與

驍騎校帶至會寧有東國會密都護府記官仇元吉前觀察判

官徐良崎見之用金一餅購去仍各題一絕句於左其仇元吉判

題菊莊詞云中朝寄得菊莊詞讀罷煙霞照海湄北宋風流何

處是一聲鐵留起相思徐良崎題彈指側帽二詞云使車昨渡

海東邊携得新詞二妙傳誰料曉風殘月後而今重見柳屯田

以高麗紙書之仍與驍騎校帶回中國遂盛傳之新城王侍郎

阮亭有新傳春雪味蠻微織弓衣之句今載漁洋續集中多慷慨

舒胤曰同里諸子工作小詞大率酬唱於菰蘆煙水中多慷慨

笠澤詞徵 卷九

百尺樓叢書

工令人色飛魂絕至於沈雄豪宕正復不讓長公稼軒一流  
葉舒崇曰往余同菊莊客燕臺一時同人若方虎人遠雪客古  
直楚鴻鷹垂掌公季友永瞻輩文酒流連殆無虛日剪燭分題  
必拈小詞紀勝每推菊莊獨步蓋菊莊詞綿麗幽深耐人尋味  
而又能落筆敏妙宜其為諸同人歎服也近復同游武林手一  
編示余對西子湖光誦花間佳句淡妝濃抹彷彿相宜恨不與  
諸故人同為擊節耳展卷之餘因念古直蘭摧永瞻玉折回首  
昔游高歌幾曲似聽山陽鄰笛也  
吳樞曰菊莊雄深雅健似  
南宋一派

蝶戀花 客中感春

儂似浮萍漂泊裏不道留儂到便儂留住柳絮隨風花落處爲儂又  
惹閒情緒 紅淚拋殘無一語滾滾難描最是傷春句試問荼蘼開  
似許如何春又將歸去  
梅花曰淡  
語自妙

鳳棲梧 春草

廉纖絲雨春陰重嫩草平鋪低把金鞍鞚綠遍天涯無半縫憐伊歲  
歲和愁種 飛絮落花都不動斗帳微寒自做池塘夢明日踏青誰

與共芳郊怕損鞋頭鳳梅菴曰夢月迷香自覺旖旎葱倩之色此爲過之

畫屏秋色 重九登姑蘇城上作

鶴市登高日舒倦眼萬疊青山攢碧天外歸帆天際歸雲斷橋人寂  
花草記吳宮但野燒荒原堆積且放却登山屐聽城內哀笳城邊畫

角無數通侯高第建牙檠戟 追昔可勝悽惻麋鹿散蒼茫無極闔

閭基址淮張宮殿頓成遺跡欹帽戰西風憑欄淚濕窮途客短髮蕭

絲槭槭諸事總飄零只有清秋過雁淒斷高樓顏色梅菴曰羽調淒涼

念奴嬌 題陳其年烏絲詞

彼鬢何也吐烏絲小字公然滿幅細嚼高吟三百遍句句響過哀玉

被冷香殘酒醒燈炮最怕霜毫禿而今絕妙依稀燕泥梁屋 却憶

去歲春風吳門絕句數首江烟綠謂與高人元歎說許我香奩堪續

去春其年過吳門作絕句十二首其贈僕云昨見高人顧元歎說君詩比玉溪生今朝果讀香奩作喜汝風流却老成 吹裂銀

笙拓殘金戟一任歌徵逐何時斗酒與君汎愁千斛

滿江紅 廣陵旅感

十里蕪城風景異漫天飛雪嘆半載塞驢皂帽空彈長鋏雁字不傳  
雲外信梅花正憶窗前月望鄉關咫尺路偏迷堪嗚咽 畫虎志終  
消歇雕蟲手遭摧折笑寒宵擁被鹿裘如鐵世態何須防面冷丈夫  
原不因人熱看熱腸清淚幾銷磨英雄血

浪淘沙 歲暮風雪客邗江

殘臘北風驕雪壓江潮愁多怕聽廣陵濤凍折梅花香夢冷且度寒  
宵 孤雁叫江臯歸路蕭條玉鈎斜畔影空遙記取廿橋明月夜幾  
處吹簫

菩薩蠻 渡江

六朝都被江潮打興亡閱盡今非也滾滾水東流難澆萬斛愁 風

恬魚浪簇帆影搖空綠往事恨難平降帆出石城悔庵曰感

風入松 旗亭小飲同檠子亦友方虎雪客古直法乳

青春游俠去江東六博場中旗亭對酒花如雪當爐側爛醉吳儂指

點綠楊蘸水羸他紫馬嘶風 偉長方文筆少瑜子工燕市相逢吹

簫擊筑悲歌裏誰憐惜爨後枯桐只有石頭周顛雪典衣埋骨堪從

詞苑叢談壬子季夏余客京師偶偕葉子方虎雪客旗亭小飲余

賦風入松檠子和云澹煙濃樹月城東節過天中北窗高臥誰呼

起醉鄉深深處宜儂幾點白鷗橫渚一雙紫燕穿風西山螺翠晚

來工雨後難逢南金滿坐連珠斗也包容棄荆燒桐美爾相當旗

鼓百年誼引吾從方虎和云棗花飛滿坐牆東病裏愁中晚涼天

氣催人出且當杯莫問誰儂酒浪平翻柳浪裙風拖帶荷風掠波

燕子晚來工故意迎逢看看日落銀塘暗鳥啼上金井梧桐歸去

重中舊約狗屠劍俠吾從雪客和云酒帘飄颺畫橋東綠樹陰中

一時佳客都相聚斜陽外倍覺愁儂岸柳猶含宿雨鄰花暗遞香

笠澤詞徵卷九 三 百尺樓叢書

吾欲過從王西樵司勳觀宗伯寄語酒樓高李論  
文吾欲過從之句擊節曰庾公南樓興復不淺

賀新涼 旅况自遣用雪客秋水軒倡和詞韻

雙鬢蕭騷卷金臺側旅魂空颺病魔難遣隻立低徊形共影况是燭  
花垂泣提別緒春蠶蒙繭開篋鮫綃渾似錦裏相思珠淚成深淺離  
恨鎖眉難展 五陵少年都通顯嘆狂生胡琴擊碎唾壺敲扁昨夜  
邯鄲曾入夢驚斷寺門荒犬犢鼻褌何時其免飽殺侏儒臣餓死怪  
秦皇不盡燒墳典腸欲斷西風翦

夜行船 黃河岸野泊月下借宿商船舵樓

金盤堆起涼天碧撫澄鮮夜眠難得百頃黃蘆千條濁浪人在舵樓  
吹笛 月苦沙清露又白恍逢搗鼓驚濤立玉臂乍寒清輝獨冷應  
念天涯孤客

少年遊 過紅橋感舊用柳屯田韻

綠楊絲裏隱紅橋帘幙記曾挑狂似樊川情如白傅鬪煞小蠻腰  
年來漂泊心情改猶自夢江皋萬點離愁一行清淚都上木蘭橈

減字木蘭花 客途

垂鞭欲暮踏遍天涯荒草路割面西風昨夜濃香是夢中 遠山幾

點牽惹離愁渾欲斷衰柳鴉啼一片殘陽在客衣

悔菴曰佳句草堂中不多得也

憶餘杭 歸途野泊寄憶

天是柴窰雨洗碧洗盡新愁眠不得客懷如夢夢如塵小泊滯迷津

天涯蕩子誰知道低下金錢明日到夜深起坐剔銀缸生怕是成  
雙

卜算子 春恨

滿院碧桃花半爲東風瘦惱煞梁間燕子飛有箇人來否 簪柳過  
清明斜插憑纖手烟鎖樓頭翠鎖眉薄恨濃於酒

一剪梅 春夜

細雨廉纖自掩門  
生怕黃昏又到黃昏  
鴛鴦枕上拭啼痕  
多少青春  
斷送殘春 紅燭和愁  
一樣新剪得三分  
減得三分落花如夢不逢  
人未是消魂已覺消魂

惜分釵 別恨

心情別柔腸結幾回  
立盡梅梢月惜東流  
付東流郎做楊花儂逐萍  
浮悠悠 眉兒皺人兒瘦  
魂消最是黃昏候  
淚難收倚銀鈎拚着東  
風斷送離愁休休

滿江紅 吳越故宮弔武肅王用岳忠武韻

電馬霜戈馳江上  
怒濤始歇誇保障  
并吞割據韓彭比烈  
寂寞幾堆  
羊虎石淒涼一片  
銅駝月憶白鹽擔裏  
是何人關情切  
故宮內餘  
殘雪荒廟裏靈旗滅  
笑宋家南渡金甌也缺  
五國未曾生馬角  
五王



莫漫啼鵑血算原來天道好循環悲雙闕

詞苑叢談出湧金門沿湖爲錢王祠免焚燕麥瓦礫荆榛瓣香嘗  
絕余過而感之題滿江紅一闋于壁上亦陳橋驛孤兒寡婦久假  
當還意也又元時有傅按察者嘗作鳴頭綠一詞悼宋云靜中  
看記昔日淮山隱隱宛若虎踞龍蟠下樊襄指揮湘漢鞭雲騎圍  
繞三千勢不成三時當混一過唐之數不爲難陳橋驛孤兒寡婦  
久假常還挂征帆龍舟催發紫宸初轉朝班禁庭空土花暈壁輦  
路消呵喝聲乾縱餘得西湖風景花柳亦凋殘去國三千  
游仙一夢依然天淡夕陽間昨宵也一輪明月還照臨安

憶秦娥 秋夜獨坐

聲淒切賓鴻夜叫霜前月霜前月年年離別不愁圓缺 紅蕤枕畔  
心情歇吳山頂上鐘初絕鐘初絕明朝又是重陽時節

點絳脣 雨窗不寐和治湄大令

序曰時維九月序屬清秋放鶴亭邊寒花匝地射潮江上哀  
雁橫天治湄先生偶抱微疴閒吟短句二毛生鬢強扶落帽  
之晨五斗折腰空負漉巾之興爰歌白苧未遂登高漫託烏

絲聊同勝賞余因搦管敬和新詞願寄同人不忘佳話云爾  
時癸丑重陽後一日書

颯颯乾坤簾前暮雨西風透秋潮如溜鐵騎聲還驟  
腹轉車輪綠  
鬢原依舊君知否一分重九消得人兒瘦

羅敷媚 無題用香巖齋詞韻

梵字闌干銀屈戍錦瑟歡逢彈破春風都在花香鬢影中  
簾前鵲  
腦烟初散惜別恁恁翩若驚鴻頓隔屏山路幾重

踏莎行 愁

着地尋來無端牽惹一生鎖住眉尖下如呆似夢復如癡憐伊倒被  
心腸挂 脈脈紅樓萋萋綠野一江春水茫茫瀉好花明月總憐人  
小窗彈破淒涼話

百字令 索汪蛟門舍人新詞

金門游戲向人間，唾咳皆成珠玉司。馬愁消方朔，倦傅粉薰香鹿鹿。  
才子吟紅佳人拾翠，辛柳真臣僕。新詞好寄與君齊，被絲竹憐余  
如此飄零。劈牋飛檄，夜夜燃官燭，腸斷西泠。衰草暮何况，荆高哀筑。  
驅駕花間，頡頏蘭畹，兩者先生足。先生不棄貽余黃絹千幅。

訴衷情 寒夜

霜華初墮，溼紅樓，悄坐擁香篝。撩人薄寒，天氣清冷，怯凝眸。寶鴨  
睡篆烟浮，理衾裯。幾聲街鼓，萬種離愁，都上心頭。

摸魚兒 寒夜觀劇演韓蘄王夫人故事

舞氍毹，霜天夜冷，畫簾銀燭如晝。一聲河滿，腸千折，只有青衫依舊。  
君見否，西陵畔，兩家錢趙。惟衰柳霓裳休奏，但紅粉英雄也曾相助。  
搗鼓長江口，空侔傑驗，取衣冠優孟。幾回燈下搔首，猩絨繡襖，芙蓉  
頰，值得當年消受。揜短袖，人未老，功名莫漫同芻狗。天移星斗灑。

珠淚羅襟悲歌慷慨拚與銷殘漏

霜葉飛 冬閨用周清真韻

雁聲草草南樓過齊飛羣下江表蘭膏和淚咽空房小膽添幽悄漸  
哀角霜林催曉殘星數點銀蟾小又尋到深閨把半枕孤眠滋味偏  
來相照 淒淒遠樹烟迷關山路黑縱有遊魂難到玉簫徹夜弄新  
聲輾轉傷懷抱寶瑟鈿蟬都棄了怕彈別鶴離鸞調拚得朝朝暮暮  
鴛枕香消淚痕多少

春衫淚 一客懷

子規叫初歇正客懷撩亂無人猜着明月樓前碧桃花下記當日煙  
鬢霧薄癡如中酒也都想日斜妝閣 心情惡看翠袖重搵淚珠彈  
却斜壓香衾低垂羅帳幽夢後天涯原各且把斷腸提起拚做楊花  
向江南流落

醉春風 豔情

烟暝蘭膏墜花影簾篩碎耳聽魚鑰漏沉沉睡睡良夜如梭好天  
似水肯孤鶉被 界粉香腮膩半鞦韆烏雲髻眼睽鴛瓦月朦朧未未  
未瑞腦重薰文犀再掠且休厮覷

江城子 閨怨

芳容消瘦柳腰柔話離憂捲簾鈎猶記別時南浦繫扁舟一作月誓

香盟成底事千種意付一作與東流 從今羞整玉搔頭恨悠悠懶凝

眸非是怕看花落一作落花時節怕登樓縱掃雙眉青似黛鎖不斷許多愁

滿江紅 羽檄交馳慨然有從軍之志感而賦此

寶劍裝成思燕頤當年投筆詎便少烏號赤兔流星霹靂笳吹橫天  
營壁冷戈鋌匝地烽煙急問何爲猶自着青衫真無策 射虎恨難  
消釋斬蛟志今須畢把茶經笛譜忙忙收拾生怕死埋白玉塵且教

醉拓黃金戟看馬前飛檄掃千軍呼殺賊

一痕沙 對鏡和勒山韻

愁畫遠山鏡裏難掩春波帳底含笑復含顰肯窺人 小立妝臺悄

悄又被薄情偷照羞澀却難拚背郎看

離亭燕 偶憶

記得鴉鬟初剪嬌暈額黃低淺盞枕添香薰翠被曾把絞綃偷染悄

悄悄防閑早被鸚哥聽見 桂子櫻桃呼徧誰鎖東風庭院憔悴章

臺楊柳色此際綠陰濃滿懊惱是西陵牽惹離亭飛燕小玉傳桂子櫻桃俱婢名

沁園春 寄曹顧庵

詞苑叢談曹顧庵學士詩詞流播海內已三十年辛亥復游京國與同志唱酬意氣

凌霄精力扛鼎新詞一出小胥競寫余嘗見其京華詞集觀女伶高陽臺一闋云鶯舌新調雅鬢猶彈湘裙欲整還拖懶

散心情朝來愁畫雙蛾風約繡簾搖樺燭對菱花倦眼生波儘嬌憨動人些子元不爭多魂銷一曲清歌却似曾相識無

可如何影好難描空勞石墨三螺燈前小立紅妝換笑還噴喚弟稱哥暗相憐細腰無力又著蠻靴未知女伶何人知學

士猶有白傅情懷也余在西陵賦沁園春寄之云

金馬銅龍游戲當時犢車入燕看禁烟藏柳鶯啼舊樹玉河浸月雁  
訴遙天華轂朱門白衣蒼犬田竇紛紛絕可憐歸來好有陶家松菊  
謝傅林泉 舊游景物依然倩紈扇新詞記往年想漳水臺空梁園  
鄴下華清夢短杜曲樊川無數紅牙一羣腰鼓秋水春颿書畫船重  
來此聽黃鸝細轉坡老堤邊

漁家傲

艾虎釵符懸百結蘭橈重汎菖蒲節影漾湖心清又徹無休歇子規  
枝上聲聲血 瘞玉埋香魂斷絕銀濤江上空嗚咽莫把靈均閒話  
說春纖捏半灣邏沙沈檀屑

詞苑叢談乙卯五日泛舟午風酣暢畫舫笙歌湖山環繞冶湄使  
君載酒放鶴亭邊其弟中溪子偶尋小青墓不得微吟消魂一半  
是孤山之句余信口足成之云青青芳草瘞紅顏愁對雙峯似翠  
巖多少西陵松柏路消魂一半是孤山相與拍浮叫絕酒痕墨瀟

幾污衫袖酒半小憇處士祠中分韻賦漁家傲一闋已而夕陽在  
山人影散去逋仙有靈亦應呼梅妻鶴子共伴香魂于暮煙衰草  
之際也冶湄詞云面面漣漪呈繡縠晚浦小荇分新綠何處閒情  
聲陸續人爭逐畫橈龍笛吹寒玉幾負芳辰空鹿五絲誰倩春  
纖束寂寞香魂遺恨觸尋芳躅一阡荒草銷金屋中溪詞云湖面  
晴分錦帶繞午風謾謾笙歌裊畫艇飛來聞語笑恣遠眺蒲樽催  
動紅顏早涼起孤山停晚棹梅銷鶴去青苔老一任  
閒雲籠翠篠人懊惱蛾眉碣蝕香魂杏余詞云云

浣溪沙 初夏

懊惱提壺喚客愁小窗濃綠上簾鉤淺紅深白一時休  
悶數落花鶯舌老閒鈎飛絮燕泥柔擡將倦眼倚高樓

清平樂 春雨

梨花無語斷送春如許因恁斜陽留不住變作一天絲雨  
簾前都滿苔痕魂消不等黃昏柳眼皆含珠淚山頭錯認巫雲

柳稍青 題畫

曲岸迴沙遠汀孤嶼衰柳風斜淡寫青螺輕描翠黛怕染霜華  
酒



醒人遠天涯魂消處烟藏暮鴉彷彿倪迂依稀荆浩秋到誰家

蜨戀花 楊梅

紈扇生風人衣葛嘗罷櫻桃又過黃梅節青李來禽瓜果列生生  
啣碎胭脂雪 冰碗盛來消暑渴爭似楊家一種瓊漿絕點破絳脣纔  
一撮輕羅色印春纖捏

燭影搖紅 除夕

隔歲東風預欺旅鬢添華髮屠蘇傳徧守蘭缸怎得消愁法料是紅  
闈早掩訴燈花向伊難說除非好夢歸去相尋不教閒殺 十萬笙  
歌繁華自趁江湖發椒盤歲歲憶團圓翦燭頻移榻那管今宵帳冷  
眞孤負爆聲喧熱定香橋下囑付雙魚替傳錦札

沈時棟字成廈一字城霞號焦音又號瘦吟詞客明隱君永啓子

有瘦吟樓詞

尤侗良齋倦菴吳江沈子成廈以瘦吟名其詞何居豈追隱侯之餘風耶遙遙華胄吾不論已若吳

江沈氏固詞人之淵藪也詞隱開疆翰通繼之復有適軒著爲  
度曲須知絃索辨訛並能分刊節度窮極幼妙而君庸君善君  
晦諸子相與鼓吹絺繡蔚然可觀乃至香閨彤管亦題黃絹幼  
婦何吳興之多才也後來出人又有成廈其長短句同人交口  
之稱

### 拂霓裳

悄菱銅春山迤逗十分慵剛貼翠畫眉人睨小簾櫳魂銷花月地情  
重雨雲峯碧闌東恰海棠新沐露華濃幽歡莫憶怕他梨頰先紅  
憑櫻素紫簫雙品鳳樓中聯吟靈腕捷鬥茗慧心通紛香叢羨彩鴛  
穩護玉芙蓉

### 謁金門

#### 詠愁

來無據黏著人兒如絮玉筍千行流不住兩眉頻鬥聚已染鬢絲  
千縷又減腰圍如許兀自襟懷銷不去釀成腸斷句

徐湄字方思諸生有玉峯倡和詞

徐遠源梨里志湄父鉞字右文與兄鏞同有聲費序湄少

稟異資年十六補諸生旋食餼個儻自喜不樂勢位所爲詩皆  
放言極論有天馬行空之致惜隨時散失今所存詩絕少有玉  
峯倡和詞調爲百字令與辰澤貢生葉舒璐往復之作兩人各  
二十疊均同里唐維申叙又云涓少負才名詩文脫口即是其  
叔虹亭太史執甚稱之嘗作書令謁崑山健庵尙書適有客時  
正酷暑涓脫帽解衣作枕臥階上會尙書送客涓鼻聲大作笑  
曰此狂士也姑辭之闍人促  
之醒告以故涓飄然持衣去

百字令 中秋玉峯寓館和葉景鴻來均

可怪蟾光偏不許詩人等閒消受反覆浮雲原易變看盡白衣蒼狗  
今夜牢愁七分無賴此外三分酒寒窗寂寂可堪人月都負 誰念  
桂苑飄零荷池冷落如此人儂憊一片鄉心并旅夢堆上雙眉微皺  
月不常圓人尤易散卿亦關心否佳期難再消愁還約重九

又

名韁利鎖把無影樊籠鑽身領受臥虎伏龍反委棄但愛李猪張狗  
死且不辭官何足戀且罄樽中酒興來狂跳青萍從不人負 除却

吐鳳奇方描鸞絕技無計驅倻懔霜浸寒階秉燭起呵硯冰紋縠皺  
百疊仙璈一羣蠻鼓差足相當否嘯歌不淺漫悲身世陽九

又

悔却平生只疏狂兩字輕輕擔受由竇吠籬何足齒公等從來如狗  
數曲旗亭清歌畫滿賭勝雙鬢酒臺名避債詩逋畢竟難負 便是  
七步能成八义易就怎解人倻懔嘹唳天邊聲斷續雁字斜飛雲皺  
淡月疏星哀笳急杵能得高眠否離騷繙遍怪伊篇只名九

又

瑣窗俏語問簾前花月儘君消受怪底吟髭撚屢斷神似喪家之狗  
繭紙盈箱蠻牋滿篋可換鄰家酒錦囊何在明日還許僮負 今夜  
釀熟新芻低鬢淺斟爲爾消倻懔三喚檀奴不一應羅袖遮燈紅皺  
減字花前偷聲月下便算英雄否百年一夢笑他秦七黃九

吳景果字旭初一字勗初號半淞明太僕邦植五世孫諸生官懷

柔知縣有賜書堂集

去病案半淞少穎發其詩賦為邑潘耒徐

三遂入都分纂歷代詩餘及子史精華等書既官懷柔而于學未嘗稍輟云

別銀燈 與杜雲川同宿蓮灣作

燭吐蘭心半爇好共醉海棠花下閒擘烏絲笑拈紅豆繙遍筆談詞

話待招羣雅重與訂吟蓮小社 引避久甘三舍美睡肯孤今夜我

夢方酣君吟正苦陣陣風鳴窗罅藥欄紅亞怕又見一番飄謝

葉舒璐字鏡泓一字景鴻明虞部紹袁從孫大理卿紹顒孫歲貢

生震澤籍 有月珮詞分干詞鈔

南歌子 雜姬

鵝淺初勻額雲低乍壓鬢琴心

詞雅

漏出小眉灣手摘雙頭

又作分摘幾頭

蘭蕊暗生憐

語燕窺閒繡啼鶯怯小眠

又作花暈從嬈

夜來私語

華路怪鴻音迢遞不到山城

周廷諤字美斯一字笠川明瑞安令大章裔孫諸生有笠澤近稿

滿庭芳 閏七夕用吳職方七月八日夜韻

靈鵲驚飛黃姑速駕一年兩度見犇波痴牛駮女驩極怨還多歲歲  
離多會少東西望淚眼模糊喜今夜金風微扇流月入高梧 飛梁  
重握手相逢如夢猶恐蹉跎嘆人間天上好事多磨再撫瑤琴錦瑟  
暫拋却機上金梭怕又是五更雞唱星散界明河

沈 栩字冬星有醉花詞

蜨戀花

春色方濃香氣暖愛向深叢勾引情絲亂宿粉褪時憨態軟舞衣更  
倩嬌紅染 密意騰那雙袖顫葉底低徊休把全身現惱煞踏青游  
女扇錯教撲下桃花片

綺窗前因甚蟾輝三五未曾圓

鳳皇臺上憶吹簫 戲贈

斷頰霞飛層綃雪聚額黃初覆氍毹正勻蛾碧淺搗蜴紅纖報道春  
深近也遮莫是小膽生寒偏又慣無端吃吃長自憨憨 慵拈紅牙  
翠管怕周郎未顧蕙性先諳早花媒射覆猜破宜男受殺欵傾弄酒  
嬌波溜春暈微添誰憐卻秋風房老寫徧雲藍

唐維申字翰思號蓴村諸生

嘉興籍 有磨閒集

沁園春

狂客悲歌擊筑敲壺淒其以清况銷魂蕉雨聲聲浙瀝攪愁簷鐵故  
故琮琤負羽徐陵辭家王粲千古牢騷總未平驚心處是錢江匹練  
界破郵程 無窮孤悶難傾但塊壘頻澆仗酒兵悵飄零倦客孤將  
游興蒼茫旅思釀就詩情推枕披衣吮毫擘紙幾度消磨長短更京

笠澤詞徵卷九

完



卷十

邑後學 陳去病輯錄

清

沈曰霖字驥展號紉芳府學生有紉芳詞粵游詞粵西瑣記

楊復吉云

先生工于詩餘入粵時曾有粵游詞二冊鏗鏘幽渺蒼古悲涼直可衙官辛柳此外嘈嘈細響更當唾涕棄之矣文惜命達沈

沒巾箱劍氣珠光日就消歇又安得願曲周郎登諸梨棗令詞壇另建一幟耶

祝英臺近

抵石門

丁紹儀詞綜補作行經石門

產女亭語兒涇漸近石門矣別淚揩乾丁作努力做游子生平未出

門行行非小可一作容易萬里路此纔嚆矢從頭起料理詩紀郵籤萬

山與千水丁作千水復千水休道離家已二百餘里須知他日歸來重經此

處已喜煞鄉音在耳

師師令

遊龍頭山

粵西瑣記山在陽朔縣治後唐祠部鄴未第時讀書於此山下有岩名讀書岩解縉

有詩云年深寺久無人住惟有石岩名讀書及余至而寺亦無有矣詞以寄慨

河山興廢尚滄桑改再荒巖祠部讀書臺消幾日風吹日曬解大紳

來時已壞况復殊年代空教筇屐蒙茸隘向邨農閒話居然曉事

指余迷津不管話頭錯對茅屋炊烟殘照內有讀書人在

鬢雲鬆

遊天鵝山

瑣記山頂小石長頸肥軀略具鵝形故以名山之陰巨石寬廣可容數百人予於己

卯重陽前一日登之喜其有此佳處怪曾遊者不先我告也

路崎嶇山區匝一片寬場坐可千人合不怪前遊虛我拉芒屨穿雲

留待登高踏木蕭蕭風颯颯咳響空山疑有行人答酒泛茱萸此

地盍秋色濃酣不用攜金盃

風入松

遊棋盤巖

瑣記棋盤岩舊名豹隱山世傳為夏相公宅基竅開三洞捫蘿而上洞有石似碁盤

棋子可弈相傳仙翁對局之說殊未可信而所見弈具果不誣也

圍棋纔罷訪林邱恰好弈巖遊石奩石罨當年蹟曾仙叟相對文楸

野鳥林間剝啄聲疑落子巖頭 昔僊果是弈中秋遺譜盍余留斜

陽徙倚忘歸去空枰對兀自凝眸強捉樵夫臂問爛柯人是伊不

洞僊歌

遊僊人峯

瑣記棋盤岩側有石人袍笏儼然名爲僊人峯

亂山堆裏問僊踪何覓端笏拖紳似人石笑頑空無分金闕朝天荒

徼外瘴雨蠻烟淪謫

石人微笑我爾罪伊何也作流離嶺南客歎

艸露年華萍水生涯紅塵足空趺兩隻盍共我同僊此山中看幾局

滄桑有如碁弈

齊天樂

古松

瑣記興安靈川二縣間古松夾道黛色參天清陰蔽地惟恐有人斬伐乃懸牌編號以記之約

計萬餘株綿亘幾二十里肩輿其下兩耳喧濤令人作出世想

肩輿天裊嚴關度行來最松深處黛色參天清陰蔽地樵子不曾斤

斧問松不語算幾代風霜幾朝雨露青到而今托根尙是宋時土

種松人去已遠勸君休只管低徊不去笠雪鞋花橋霜店月未暇科

頭箕踞由他前路讓人逐雲行  
我和鶴住人指松陰道斜陽已暮

張棟字鴻勛號看雲貢生

震澤籍

有看雲吟稿

水龍吟

廣陵調古誰彈拂牀焦尾無人御空庭月落瑣牕人靜悄然無語日  
送飛鴻響隨流水淨蠲塵慮望玉仙攜手松風謾謾便心會天然處  
休說成連音妙衆山中科頭箕踞神融意徹左司新興不由人助  
詎似泉明絃徽希設襟懷鴛鴦却無心感歎當前景物落花飛絮

曹吳霞字象雷號翠亭有浪游草

鷓鴣天 自松陵啓行至山右時尙未冬

漫向離筵唱渭城眼前無復柳青青  
封姨滕六偏憐我送過今朝第一程  
魂易斷恨難平有誰知我此時情  
吳船恰似迴腸轉柔櫓啞啞不絕聲

春從天上來 觀雨霖鈴

身世飄零嘆辰米遺墟客館淒清故鄉何處七二峰青離別幾度曾  
經道吳霜不到還來客鬢星星更愁人是江南樂部曲唱零鈴 追  
思明皇昔日歷蜀道崎嶇夢繞銀屏七夕幽期三生密誓脈脈苦憶  
前情況天涯倦旅淒涼對燈火微熒睡常醒聽滴殘宵漏又度鐘聲

綺羅香 又

鞞鼓東來鬢輿西幸歷盡崎嶇危棧片雨時飛猶似血流坡畔想鈿  
盒已逐沙沉痛羅襪久經塵掩聽鈴聲切切淒淒分明如訴玉環怨  
誰將天寶舊事寫入新翻曲調助人悲感彷彿當年頭白宮人淒  
斷悵歌罷寂寂簾擁待歸也深深庭院猛回首數點青峯曲終人不  
見

袁

棟字漫恬號書隱著有枕筵吟稿

去病案先生爲湘涓從祖  
杜門著述號稱該博所撰

書隱叢說如千卷網羅放失殫見洽聞幾與玉樵  
觚賸並傳不朽而倚聲亦開一門風氣之先云

蘇幕遮 會飲聞歌

暮雲橫新綠繞金谷園中能有花多少會飲高堂風正峭急拍么絃  
愁爲清歌掃 古今來人易老惟有酣狂撲面塵難到宛轉更深餘  
韻裊燭炆香闌庭外星河渺

拂霓裳 新荷

暖寒天幾番花信各消殘堪賞處池塘點點小荷圓引風偏婀娜貼  
水更盤旋俯平川有垂楊掩映綠如烟 卷舒自便一派淺碧琅玕  
翔錦翼瓊珠歷亂十分妍幽情承月露清影亂雲山喜田田看波心  
漸次捧嬋娟

轆轤金井 柳

花風駘蕩有堤邊垂柳輕翻高浪白絮漫空做飄零愁况春花恹恍

共併作十分惆悵金井桐珪玉池藕蓋清陰相傍  
紅塵撲人面上  
喜維舟樹底釣絲漁唱野岸橫塘見消停新漲碧鷗無恙且莫向離  
亭祖帳午際微風黃昏淡月絲絲飄漾

楊復古字列歐號慧樓乾隆壬辰進士

震澤籍

揀發知縣

去病案先生博聞強

識著述甚衆而其所續昭代叢書各帙尤能高掌遠蹠迥出張氏之上厥後沈懋德氏又能繼踵刊布用成一朝之巨製則先生之爲功多矣余嘗賃居南郭聞故友吳燕蘭云渠家大司成第即先生故宅亂後祇一寡孫媳衰老無以自存故宅歸于吳然猶能指其後院爲先生箸書之樓云

沁園春

贈吳枚庵翠鳳

棄疾案詞見吳氏東齋脞語

我耳枚庵藉甚香名十有餘年悵寥寥居近問奇空願盈盈水隔御  
李無緣閒睨書城偶窺藝苑省識吳門有謫仙今何幸得假途剡棹  
維誦瑤編 鱗鱗生紙雲煙更咳吐隨風落九天看七襄機組賀夔  
錦嘔十華券合江管花鮮百一刪存千秋業在嘗鼎何殊見豹全披

吟久勉盥將薇露題向筠箋

清平樂 題珊珊夫人寫韻樓詩集

九天咳唾珠玉隨風墮引鳳簫吹錦瑟和領取綠窗清課  
彩鸞寫韻家風閨房秀出江東何似南州都講西河一瓣香供

吳中奇字瘦夫

百字令 顧棻匡探梅鄧尉賦詞索和次韻奉酬

霜風如剪看裁成鄧尉梅花千樹斷澗流澌疏照影宛似淩波微步  
山店雲封茶寮雪霽屋角青旗露茫茫香海渾疑山盡無路 最是  
騷客騎驢奚奴挈榼獨撚吟鬚去看到寒深呼半臂不覺花光將暮  
妙思紛來與梅俱化豈減何郎句新詞重按幾番玉笛低度

汪鳴珂字綸宣號瑤圃官上思知州有春雨樓集 去病案瑤圃工繪事嘗客揚州

爲時所重史赤厓在澹園席上亦贈以二律有云羨爾才名騰彩筆如余蹤跡滯漁磯不逢佳士留青眼枉笑山人愛白衣



浣溪沙 小園坐月

雨歇梧桐夕景浮小園丁詞綜補作闌花韻漫淹留碧天如水院如秋 最

怯涼風吹舊夢劇憐淡影照新愁個人想像倚高樓

朱剡光字敬明諸生

南歌子 狀元游街圖

仙闕登鰲喜天街走馬忙球簾十里捲紅妝爭羨宮花帽顛錦衣郎

縱果才無偶還因福寡雙披圖對鏡細端相已是輸他年少占春光

史善長字仲文一字誦芬號赤霞諸生有翡翠巢詞去病案衛夢

題史赤霞翡翠巢詞即用集中論宋詞韻戲馬臺邊柳送征人  
滿城風雨歸來重九除却新詞無長物贏得千金享帶問辛柳  
一錢直否尚有梅溪真同調也十年空費屠龍手長只是征鞍  
驟間從九腕舉三秀度新腔偷聲入破嚴分細剖天與豔情無  
豔福那得笛牀歌袖但伴我秋燈如豆先向朋箋書左券到相  
逢一笑休開口歌一闋一杯酒則先生詞為靈芬所激賞可知

矣惜原稿難覓僅於詞綜詞雅得此數閱真瑰寶也又案先  
生歿在嘉慶十年前其所著詩名秋樹讀書樓集同邑柳樹芳  
嘗為雕板阮芸臺王惕甫姚春木諸老咸為弁首姚敘略云吳  
江為詩人淵藪而史君赤霞於乾嘉間尤以詩有名於時自其  
少時遭王侍郎頤而意氣岸然既出游諸公愛其才爭辟之而畢  
尚書沅王侍郎昶姜尚書晟知之最深畢尤稱號召天下文士  
前後在幕府最久然未嘗一有干請尚書歿卒護送其孤喪以  
歸當是時王公已告歸君從之游久而不厭相與論列書史考  
證文字歌詠為樂不久而王公及君相繼以歿悲夫初予識君  
於王公坐間最初在西湖瑪瑙寺王公大會江浙名士予輩皆  
得從游其後公年八十年而君之墓有宿草矣又何其偉序云  
其坐人迄今復將三十年而君之子癸亥冬吾師八十生辰余往  
赤霞為吾師述庵先生高第弟子歸自楚中為吾師佐校春融堂  
介壽始獲交君君年逾五旬方歸自楚中為吾師佐校春融堂  
集湖海詩傳諸書席間譚秋帆尚書治教匪事鬚髯張與豪  
甚頃刻浮十大白面顏不見醜時姚君子壽亦在座笑謂曰君  
落筆時其豪氣亦如是耶曰然則何不見示曰詩文  
略有數卷我飲方酣無暇姑俟異日何如座客皆大笑

### 蝶戀花

湖外新晴湖上雨煙柳霏霏遮斷春城路  
姹紫嫣紅花事暮忍教吹

盡閒風絮 睡鴨爐熏沉蕙炷倦客孤舟好夢渾無據  
第四橋邊雙

燕語那人曾共吹簫處

茶瓶兒 得家書

塞上寒多遲雁信秋漸老南雲飛盡誰與傳方守茜紅斜壓玉手團  
香印 身在曾穿鵝鵲陣勞粉淚臨風偷搵歸計知難準小樓闌角  
綠損春光鬢

洞僊歌 西安送春

曉鶯恰恰任枝頭啼遍難向風前喚春轉又曲江江上一片飛花花  
笑我也怨天涯歸晚 倚樓人望遠幾許柔腸悄拍闌干有誰見綠  
到柳千絲錯怪東風誤好約玉驄嘶倦想書劍輕裝未應遲只負了  
將雛舊時巢燕

蝶戀花 珠街鎮舟夜有感寄述庵先生滇南

淺卸吟篷烟際宿慣逐羣鷗不管溪南北岸外波搖新雨綠羅衾半

展燈垂粟 謝客閒情耽水竹問訊春風天末人如玉舊燕空來簾  
未軸啣泥只願巢君屋

金縷曲 調黃讓耘

奇事真堪詫問恩恩小家碧玉汝南偷嫁怪底歸心如箭急碁局才  
彈又罷等不到夕陽西射恣折柔條看入手好春風恐惹黃鸝罵珠  
蚌合定無價 纏絲忍負千金夜想紅窗一燈剪後晚妝初卸道是  
新知原舊識絮絮避人昵話記當日簸錢堂下我亦時曾窺半面訪  
君來切莫依簾罅煩玉指備觴炙

鵲橋仙 紙馬頭

削耳批風懸晴夾鏡可惜有頭無尾馱人却反倩人扶笑兩足騏驎  
行地 青絲絡付阿侯穩跨寸步莫教顛躓朝朝騎去復騎回問曾  
見使君來未

期天子 泥孩兒

羊車巧寫影要裝出寧馨光景憐伊秀整就摩挲休猛 好愛護風  
飄兼雨打未著蘆花肌自冷憑傅粉切莫近何家湯餅

定風波 假面

乍窺人暗裏回頭知伊是好是歹百色裝成千般學慣佳惡憑人揣  
笑呵呵怒偏快翻轉全非舊時態堪怪只換來換去金錢能買 年  
頭偶然戴但逢場眼底皆公輩任尋歡索惱低眉努日朝夕相看待  
我如今應耐卿等何然面皮改無奈掉下向人須教羞壞

桂枝香

穿珠巷口瞥見個珠娘眼波驚溜碾玉裝成影倚素綃光透斷紅纖  
靨脂添瑩料柔肌滑難留手者般情味搓酥搗粉是誰消受 顛屋  
外蘿牽翠袖看如此丰姿怎淹蓬漏寸步須那特地爲伊拖逗從來

國色由寒賤產西施苧蘿邨叟鳩媒難託而今贏得兩眉長鬪

金芝原字壽潛號瑤岡乾隆己亥恩科舉人內閣中書有願性齋

詩集

惜分飛

相見依然人似舊比似年時較瘦笑問平安否不言空掩羅衫袖  
再入天台迷洞口僥倖重逢非偶往事空回首落花流水春歸後

顧我樂字正叔號竹嶠乾隆己酉舉人官崇明教諭有論癡閣詞

鈔二卷名竹籜香集

袁棠云先生文壇夙望平時績學砥行雅不欲以詩名而詞更無論已然偶一倚聲

亦能擺脫濁穢摠寫性靈藝林以此交推之近客山右去冬郵示平圃秋吟十數閱係一時興到之作風流宕往讀之齒頰都芬覺君家彈指一集不得專美于前矣

雙調望江南

江南好香草問吳宮鹿走胥臺春寂寞烏唬茂苑夜朦朧劍去霸圖

空 白隄畔舊是綺羅叢  
覓醉金樽花市雨招涼  
畫舸柳陰風人影  
惜愔愔

江南好歌吹屬揚州  
一闋瑤簫剛入破  
二分明月恰當樓  
小杜最風流  
雷塘路過客恣淹留  
螢火流殘家國恨  
燕泥落盡古今愁  
頭白感重游

江南好京口是名邦  
鐵甕宵聲城角奏  
金山曉色寺鐘撞  
殘夢落春江  
中流渡擊楫氣難降  
十葉帆收瓜步雨  
千尋練接海門瀧  
白浪打漁缸

江南好苕霅二谿并  
抽筍山園春雨足  
焙茶土竈午風清  
美酒醉烏程  
生涯穩婢織與奴耕  
邨舍桑鳩催曉日  
湖田秧馬趁新晴  
蓑笠更尋盟

江南好形勢據錢塘  
地擁八都爭勝負  
名高五代閱興亡  
霸業未全

荒龍庭狩南渡事倉皇故國羹魚憐宋嫂新祠泥馬感崔郎風月  
恣徜徉

滿江紅 謁楊忠愍祠

古柏陰森見一片寒雅飛集借淨土香龕供奉貞魂毅魄

祠在京都宣武門外

松雲禪院夫遠道賜環恩未報上方請劍情尤迫看繡衣白簡滿朝

人張附祭班空緘嘿 蚺蛇膽何須覓魑魅境寧教謫只囊頭三木都人嘖嘖

揆席豈容林甫踞彈章更比邦衡激想臨危含笑對龍泉心猶赤

師師令 題姚棲霞女史剪愁吟遺藁

愁鄉女史苦埋愁無地舊愁剪斷又新愁直恁事纏絲到底飛絮撲  
簾人病起想綠窗閒倚 于今玉殞香銷矣歎暮烟空紫粉匳好句

總成灰只白骨青山堪指

白骨青山千古恨  
女史詠落花句

重向雲藍尋細字正客

愁如水



賣花聲 白下聽歌

六代儘繁華國色曾誇秦淮風景浪淘沙衰柳不堪垂繫馬只噪寒  
雅 何處按紅牙水閣周遮教成度曲是生涯頓老云徂塲屋在誰  
弄琵琶

沁園春 盆梅

紙帳酣眠清夢回時陡聞暗香記仙子憑欄鬢拖曼綠宮人攬鏡額  
暈嬌黃分種銅甌托根磁盎位置湘簾斐几傍開時節有藥鑪經卷  
伴爾徜徉 山中別却松篁好剪拂虬枝載野航正凍雪消殘難逢  
驛使晴煙鎖斷懶叩僧房礬石低排紅泥淺護添得園丁幾日忙待  
騷客向樽前細嚼座右平章

鷓鴣天 送春

靜掩重門客到稀綠陰庭院送春歸荼蘼色褪經朝雨鷓鴣聲悽戀

夕暉 情脈脈思依依懶將纖指弄金徽隔簾便是天涯路寄語楊  
花莫浪飛

似娘兒

縮起綠雲稠掠牙篦燕尾雙勾盤龍鬪畫妝臺巧金釵未壓翠鈿未  
貼已覺風流 側鏡細凝眸鬢鬆鬆時樣新偷低聲喚近檀郎覷這  
番梳裹恁般香膩怎不回頭

瑣窗寒 寒食旅懷

岸柳舒眉江桃泛靨清明近了乍暖乍寒欲卸吳絲尙早被東風吹  
動離情登樓極目平蕪杳正傷春人倦錫簫聽罷鶯聲又老 破曉  
紗窗外宿霧濛濛輕烟裊裊重簾不卷一任蜨愁蜂鬧愛冶游拋却  
秋千踏青何處多芳草試問他陌上金鞭恁般年少

過秦樓 春日同潘榕皋畏堂兩先生遊王氏廢園

境愛繁華遊舫豔冶恰是俗人心眼復園才憩又見鄰家古樹查牙  
葱蒨趁此貽宕春光步訪清門披榛捫蘚奈池荒鷗去石闌雲磴都  
無花片 想昔日司寇歸田營成別墅當作平泉游衍藥房筠塢閱  
過滄桑那禁飛霜零霰蘭雪堂空汎紅軒廢何來茜裙流眄只虧他  
壞壁頽垣能把塵氛隔斷

揚州慢

丙辰季冬自都回南冰阻毘陵城外偕婁東李蘅塘

王蓬壺游儀舟亭流覽竟日戊午三月北上經此重游不果  
悵然有作

喚得吳舸斲冰歸去消寒共貰香醅向蘭陵城外問傍水亭臺有蘇  
老南遷舊跡買田陽羨曾此沿洄聽鉤輈好鳥留人踏遍蒼苔 看  
花無分謝東華衣上塵埃奈漁磯輕別櫻鞵席帽襍穢重來只恐閒  
鷗笑我江帆掛風利頻催望模糊煙樹推篷聊覆行杯

水龍吟 渡江

乘潮穩坐紅船風帆一霎中流渡佛狸帳外銀濤千尺蛟螭噴霧瓜  
步參差海門浩蕩低迷雲樹悵南徐重鎮英雄事業有浴鳧飛鷺  
形勢休誇天塹閱興亡幾番枹鼓纔橫鐵鑊旋漂木杙龍驤馳鷺半  
壁江山燕子斜陽已成今古問何人擊楫狂歌身世未忘衰暮

少年游 邗江夜泊

玉鉤斜畔夜如何人影畫橋過珠簾剛卷瑤簫低咽明月二分多  
宮雅散盡隋堤樹江外浩煙波南國香銷後庭花落惆悵此聞歌

念奴嬌 宿羊流店感舊

落花飛絮問連朝風信春歸何所豪竹哀絲行樂處偏感中年情緒  
絳蠟頻燒青樽競勸相對渾無語夜闌人散此身仍是羈旅 擁衾  
幾度思量旗亭往事追憶添悽楚唱到黃河千里曲不見舊時朋侶

弱水波深蓬山路遠有夢還愁阻披衣竊歎難禁搔首延佇

唐多令 淚

氣盡奈何天神傷鄴下仙灑西風似水如鉛往事不堪閒處想懊悔  
煞廿年前 和恨寫瑤箋將愁入綺絃一聲聲撥動幽泉移向秋簷  
隨雨滴抵不過枕函邊

水龍吟 落葉用碧山韻

暮砧催動商聲亭皋一夕霜飛早梧桐乍隕芭蕉又裂窗寒夜悄擔  
月樵歸眠雲僧起眼穿林杪想孤篷載酒危厓拄杖重陽後幾人到  
腸斷榆關信杳憶三春翠圍紅繞征鴻已逝哀蟬未奏爨琴空抱  
枯樹吟成破扉留得斜陽多少怕山中路沒只應縛帚呼僮忙掃

眞珠簾 癸亥季冬白山右南歸仍寓尹湖感賦

丹楓落盡馳歸轡看茸裘破帽囊中有鬼孳寄江湖重訪魚蝦小市

到日微聞人歎息似杜老羌邨隣里應擬作蘇耽化鶴琴高乘鯉  
底事漁竿輕棄爲陌頭楊柳催人眠起嵇嬾七難堪頗病三遺矢須  
信去留都是恨算只有醉鄉差美休矣對西風搔首淚如鉛水

薄倖 畫眉橋感事

芳塘散步把橋畔妝樓徧數憶少日筆牀書籠也學絮飄萍聚借他  
家一樹垂楊和煙挽得扁舟住看山小于簪波平似鏡領略鶯愁燕  
妒到今日沈吟處已失卻兜娘繡戶被西風吹亂愁絲恨片漫空  
捲去歸塵土歡場休慕便玉京瑤島流年畢竟成虛度多情誤我莫  
遣牢騷再誤

滿江紅 題周山樓鶯湖泛月圖遺照

萍梗天涯久撇卻故鄉煙水想有客江湖寄跡扁舟行櫂宗慤乘風  
奚足羨元真泛宅差堪儼趁涼秋放櫂月明中歌聲起 烏兔走無

停軌年華逝如彈指只波光山色依稀猶是判袂人應憐聚散披圖  
我獨傷生死向蘆花深處一招魂情何已

青玉案 山塘酒家送春

柳絲絆客桐橋路是我輩銷愁處畫舫笙歌喧日暮青帘高揭紅闌  
低護渾欲留儂住 黃公壚畔空凝竚算只有鶯花如故九十韶光  
容易度桡船泛罷槽牀又注斷送春歸去

點絳脣 千人石

扇影衣香千人石是三生跡鶯花狼籍腸斷憑闌客 綠樹青山依  
舊栖金碧今猶昔風清月白度盡笙歌夕

綺羅香 蠟梅

磬口含嬌檀心孕馥名亞銅坑千樹縞袂難逢憑向曲闌無語看凍  
蓓綴處玲瓏似入道太真眉嫵料樓東月淡燈昏畫屏塵滿影來去

春風渾未相識聊屈山礬作弟水仙爲侶一縷寒香斗觸少年情  
緒蜂蝶使夢裏頻通荳蔻釵鬢邊親覩問橫陳滋味何如笑曾經嚼  
取

解珮令 自題詞藁用竹垞韵

子雲顰幌君苗筆硯把少年才氣消磨盡老謝歡場且去倚新聲緘  
恨再蹉跎雪霜堆鬢不爭多麗不貪薄倖試偷將祝英臺近寫上  
蠻牋也只當殘脂零粉付紅牙料非吾分

項 萼字肺春

震澤籍 去病案肺春生平不可知松陵詩徵亦未載隻字獨顧正叔籜香集附見一詞因急存之

并列正叔原倡于此讀之亦略悉其梗概矣問訊同岑友入春  
來眠餐奚似宿痾捐否白塔橋東唯亭路兩地寒甍共守只午  
夜夢隨左右里社題襟凡幾輩論交情如足還如手離恨積何  
時剖自傷坎壈纏身久逐浮名青衫席帽浣塵三斗挾策長安  
渾閒事歲月堂堂孤負况今日顛毛非舊金盡牀  
頭生計拙向濠梁重結觀魚偶君惠子余蒙叟

賀新涼 和顧正叔



君孝非凡士乍操觚綵花生管煙雲落紙耿耿元精羅斗宿巨刃磨  
天儔耳更何論人間金紫幾度龍門遭點額陡淩波鼓盪鯨魚尾變  
九萬鵬搏起 棘闈官燭吾悲悔感秋風年年寂寞石頭城底儕輩  
青雲難騁逐蓮士褰裳就矣嗔貝葉爇檀頂禮卅載窮交懷舊雨寄  
深情一幅桃花紙車笠誓全能幾

周 本字心涵諸生

壺中天 張幻花移居朱家角

湖山環映喜飛塵不到翠陰庭宇筆硯圖書看位置雅稱竹牕松戶  
冒雨移花衝炎徙石總是幽閒趣同心客至及時菘韭隨煮 遐想  
貞白高風屠樓上下絕勝藏春塢幾片白雲聊自悅掃却珠歌翠舞  
擇木珍禽知時異卉也愛風流主梧桐蔭滿鳳雛聲在深處

徐達源字岷江一字无際號山民候選布政司理問改翰林院待

詔有新詠樓集

去病案山民伉儷並列隨園門下水脫略畦徑

老子著述吳中文獻多賴保存所葺徐侯齋澗上草堂太常卿  
凌信祠其尤著也素愛晉接凡海內賢豪長德時相往來于禊  
湖之上 一時風流文采照耀鄉閭所刻朋儕投贈名紫藤花館  
藏帖流傳日本藏之聖廟中藝林榮之年八十無疾卒于雙螺  
亦風雅士也同治間縣令黎庶昌遵古式閭禮遣人  
以粟帛餽之雙螺爲手植盆梅二株以報時雨多之

菩薩蠻

迴廊小坐無由並，頰窩圓處遙相認。花氣撩人香吹來，一味涼。猩

紅裙角好淺露驚，鴻爪倚暖碧闌干。渾忘翠袖單。

清平樂 題許竹溪夢鷗閣圖

自慚白首尙把烟波負，一閣多君傳萬口。時有詩人中酒。羣鷗沙

艸飛飛心閒泛月忘歸，那得此間結屋拍浮同。夢花溪

水龍吟 題王研農水災紀事圖

誰能畫法監門意，筆底水隨風捲連天。一白不分河港，竟失全岸野

已無田街偏有浪犬隨人竄更慘聲四起漂棺重疊一回首心猶戰  
難忘吳淞泛宅時寓居甫里望江鄉迢迢天遠幾番結夢先人墓木將  
毋零亂隊隊飢鴻哀鳴不已催人腸斷看生綃幅幅王郎歌罷淚痕  
都染

周 霽字朗宇號愚谷諸生震澤籍有愚谷遺詩  
長相思

意難禁夢難尋一穗秋燈暝色深孤眠魂易驚 漏沈沈雨聲聲不  
管愁人不要聽黃昏滴到明

周鶴立字仲和又字子野號石落一號石臺忠毅公宗建六世孫

乾隆甲寅舉人官蒙城知縣改黃安有子野詩鈔匏葉龕詩餘  
任廷暘云先生令楚中歷有惠政道光丁亥荆州隄潰江水橫  
溢漂沒無算先生謂請帑而後給賑則溝壑已多乃自捐廉俸  
及遍假同僚金得數萬計口給發民賴以全會方伯某行部請  
鞫於先生先生佯不喻竟以鞫獻方伯恚甚輒齟齬之因遂解

組未及歸卒於漢陽著有匏葉廣詩存及維組匏葉者先生去  
官後所自號也去病案先生曾得忠毅玉印於粵徵題紀盛  
又繪石苔山莊圖史亦厓極稱譽之余初得燕山亭詞已付刊  
矣旋得其曾孫嘉麟函并所著詩餘十五首因重爲輯錄如下

燕山亭 題梁谿賈素齋金門秋館圖

如許秋光落葉紛飛客裏愁懷難寫孤館明鐙抱膝長哦想見十分  
瀟灑剛到重陽又心憶九龍山下休訝只索徧琳瑯便馳歸馬 自  
歎人海蓬飄况蕭索西風送將行者攜杖尋詩剔蘚摹碑誰似浪仙  
風雅題罷紅樓恐樓上有人牽惹歸也應重整碧山吟社

探春令 題張鹿樵中翰梅花小影

亭亭玉立問君仙骨幾生修到愛冰魂不怕寒威悄只索取巡簷笑  
曲江風度誇年少似水雙瞳照把春風豫向枝頭報又轉上瓊林

鬧

小諾皋 教弩臺懷古

白草茫茫黃雲黯黯一片夕陽平楚任英雄并吞囊括闕如虓虎到  
得江山已改那有玉樓朱戶望駸娑駘盪都化塵土組練三千嬋娟  
十五早想到分香賣履不合自誇神武老瞞也何太苦肥水城東  
蜀山泉右留者一臺如許問殘僧幾回搔首沈吟無語剩有空亭井  
冽此鑑曾經千古料當日非比銅雀深鎖屯馬成雲兵選操弩那知  
道壯心灰滅愁煞帳中歌舞撫遺跡聽梵鼓

踏莎行 楊花和金桐軒韻

屋角低飛廊腰細轉重重簾幙春陰晚二分明月一分烟都應揉作  
香痕軟 鳳子魂銷鶯兒夢懶東西漂逐游絲縮如今流向天涯紅  
牆便抵蓬山遠

屠拱垣

原名

字藻庭號荻莊又號心孩諸生有一粟齋稿

去病案

嗜酒與酣好爲高論時觸人忌而不自知也嘗館黎里周  
賜福堂與沈翽徐達源輩攬勝尋芳分題角韻相得無閒

滿庭芳 題陳芸圃學弟花間尋夢圖

蛤枕寒欺鵲爐香冷那堪夜永如年秦樓往事提起恨綿綿才得相逢夢裏又霎時驚破啼鶻行尋處碧苔蓮印約略記風前 仙踪何處寄幾時重見一晌俄延奈青鸞信杳紫玉成烟春到梨花依舊看花人難共花憐淒涼甚無情圓月多事照孤眠

编 号	.....
册 数	6
售 价	8.00

